

2 SAMUWÉL

Ini Sa Egho I Dabid Neketiig Sa Kapatay I Saulo

1 ¹Na, egoh di nematay dé Saulo i, miglikù Dabid i kedu diyà sa kinetaban di eggila sa medoo tegeAmalék, owoy duwa agdaw mig-ugpà diyà Siklag. ²Agulé diyà sa ketelu di agdaw, duen sa etaw migtebow kedu diyà sa kampù i Saulo nekisi sa kawal di, owoy épê kepong sa ulu di. Egoh di migtebow diyà si Dabid, miglagkeb diyà tanà tandà sa keadat di.

³Hê, inigsaan i Dabid, guwaen di, “Keduan ko ya? Agulé migsagbi sa maama, guwaen di, “Nekelesò a kedu diyà sa kampù sa medoo tegeIslaél.” ⁴Guwaen i Dabid dema, “Ngadan sa nebaelan? Tuloni ko aken.” Agulé guwaen di, “Migpelaguy sa medoo sundalu ta kedu diyà sa gila. Hê, medoo diyà sa etaw ta sa nepalian owoy nematay, lapeg si Saulo owoy sa anak di si Honatan.”

⁵Agulé mig-igsà Dabid i, guwaen di, “Maen di ya netiigan ko nematay Saulo i owoy sa anak di si Honatan?”

⁶Migsagbi sa maama, guwaen di, “Egho iya, nekesaletà dutu

a tuduk Gilbowa dò, owoy dutu ma Saulo i egkukung egkeles diyà sa sigpù di, owoy buyu dé egkeumawan sa medoo kuntelà mig-edà kalitun eggila eglohot kenagdi. ⁷Hê, egoh di miglalingay, hinaa di aken owoy mig-umow diyà kenak. Agulé migsagbi a, guwaen ku, ‘Ngadan sa mepion baelan ku diyà keniko?’ ⁸Hê, inigsaan di aken, guwaen di, ‘Ngadan ko ya?’ ‘TegeAmalék a,’ guwaen ku. ⁹Agulé, mig-ikagi diyà kenak, guwaen di, ‘Angay ka dini owoy imatayi ko aken! Enù ka egkepasangan a danà sa dakel palì ku, dodoo endà pelawà egkematay a.’ ¹⁰Huenan di, mig-angay a diyà kenagdi owoy inimatayan ku, enù ka netiigan ku tapay ma doo mematay. Agulé, kinuwa ku sa sayap diyà sa ulu di owoy sa sugut diyà sa belad di. Hê, inuwit ku dini diyà keniko, O Datù.”

¹¹Na, egoh i Dabid owoy sa medoo etaw di dahiya migdineg sa tinulon sa maama, kinisi da sa kawal da. ¹²Agulé nebukul da owoy mighuyhuy da owoy migpeulan da kekaen taman tumagkup danà sa kinapatay i Saulo owoy sa anak di si

Honatan lapeg sa medoo sundalu tegeIslaél etaw i Datù Nemula, enù ka medoo sa nematay danà gila. ¹³Agulé, mig-igsà Dabid i diyà sa maama sa mig-uwit tulong diyà kenagdi, guwaen di, “Ngadan sa keduwan ko?”

Migsagbi, guwaen di, “Anak a sa beken etaw dahini, tegeAmalék a.”

¹⁴Hê, inigsaan i Dabid dema, guwaen di, “Maen di ya endà nelimedangan ka eg-imatay sa datù hinemili i Datù Nemula? ¹⁵⁻¹⁶Na, danà sa inikagi ko, kuna sa mekebayad. Enù ka munoy ebà ko sa egpetuu sa binaelan ko, egoh ko mig-ikagi, guwaen ko, ‘Inimatayan ku sa hinemili i Datù Nemula.’” Hê, inumow i Dabid sa sebaen sundalu di, guwaen di, “Angay ko kagdi imatay!” Agulé tinigbas sa sundalu sa tegeAmalék, hê nematay.

Nebukulan I Dabid Sa Kepatay I Saulo Owoy Honatan

¹⁷Na, migtayétayé Dabid i egduyuy danà di egkebukul diyà si Saulo owoy sa anak di si Honatan, ¹⁸owoy igsugù di anì itulù diyà sa medoo tegeHuda sa binaelan di duyuy kepengadan da “Duyuy Busug.” (Nekesulat ini i diyà sa libelu i Hasal.)

¹⁹“O medoo tegeIslaél, nematay sa medoo ulu-ulu yu diyà sa getan-getan sa munoy tanà yu!

Nebagtang ma sa tigtu tumalaw diyà sa medoo sundalu yu!

²⁰Yaka egtulon duu ini i dutu Gat dò,

yaka ma egpetiig duu ini i diyà sa medoo dalan diyà menuwa Askélon, anì endà meanggan sa medoo kenogon anak sa medoo tegePilistiya, anì endà dumelayaw sa medoo bayi anak sa medoo endà egpigtuu.

²¹O medoo tuduk Gilbowa, yoko eg-angat-angat ta aglù ataw ka udan, ataw ka sa kepion kebunga sa medoo hinemulaan anì ibegay diyà si Nemula. Enù ka daya netétéén sa kelasag sa tumalaw, endà dé nelulowon di lana sa kelasag i Saulo.

²²Danà sa sundang i Saulo owoy sa busug owoy seleb i Honatan, medoo sa nematay da medoo mebalaw kuntelà da.

²³Tigtu eghiduwana sa medoo tegeIslaél Saulo i owoy Honatan.

Nesesebaen da egoh da nehagtay pelawà, owoy neseunut da ma egoh da nematay.

Uman da pa metéél diyà sa medoo banug, owoy uman da pa mebagel diyà sa medoo liyun.

²⁴O medoo bayi anak i Islaél, kebukuli yu Saulo i, sa migpekawal keniyu sa metolol ginis owoy sa migbegay sa imu-imu yu bulawan.

²⁵Tigtu nebagtang sa tumalaw etaw diyà gila!

Nematay ma Honatan i diyà
sa getan-getan yu.

²⁶Nebukul a denu keniko, O
Honatan sa duma telehadi
ku,
tigtu eghiduwana ku kuna.
Sa kehidu ko kenak,
uman pa diyà sa kehidu sa
medoo bayi.

²⁷Na, nebagtang sa medoo
tumalaw diyà tanà Islaél,
endà dé duen ulan sa medoo
kinemkem da diyà kegila!”

Ini Sa EgoH I Dabid Migkedatù Diyà Tanà Huda

2¹Na, egoh di neubus dé
iya wé nebaelan,^a mig-igsà
Dabid i diyà si Datù Nemula,
guwaen di, “Enù di ya amuk
mangay a umugpà diyà sa
sebaen menuwa diyà tanà Huda?”

Migsagbì Datù Nemula i,
guwaen di, “Hoð, ipanaw ka dé.”

Mig-igsà dema Dabid i,
guwaen di, “Ngadan tayu di
menuwa sa angayan ku?”

Migsagbì Nemula i, guwaen di,
“Sa menuwa Hibelon.”²Huenan
di, mig-angay da diyà menuwa
Hibelon Dabid i owoy sa duwa
sawa di, si Ahinoam tegeHéslil
owoy si Abigél sa nebalu diyà
si Nabal tegeKalmél.³Inuwit
di ma sa medoo etaw di lapeg
sa medoo malayan da, owoy
mig-ugpà da diyà Hibelon
owoy diyà sa medoo menuwa
di.⁴Agulé mig-angay sa medoo
tegeHuda diyà sa menuwa
Hibelon. EgoH da migtebow dutu,

hinududan da lana sa ulu i Dabid
anì tandaan da kagdi dé sa datù
diyà tanà Huda.

Na, egoh i Dabid migdineg
denu sa medoo tegeHabés
Galaad sa miglebeng si Saulo,
⁵migpeuwit kagi diyà kenagda,
guwaen di, “Ungayà ku
metabangan i Datù Nemula kiyu
danà yu migpehaa sa kehidu yu
diyà si Saulo sa datù yu egoh
yu miglebeng kenagdi.⁶Owoy
ungayà ku ma hiduwan i Datù
Nemula kiyu owoy ipetuu di ma
sa igpasad di diyà keniyu. Na,
danà iya wé binaelan yu, mael
a ma sa mepion diyà keniyu.
⁷Huenan di, pebagel yu dé
owoy pebalaw yu ma, enù ka
nematay dé Saulo i sa tapay datù
yu. Owoy ini egoh hinududan sa
medoo tegeHuda dé aken lana
enù ka tinandaan da aken dé sa
datù da.”

Negelal Datù Isbosét I Diyà Tanà Islaél

⁸Na egoh iya, si Abnél anak i
Nél sa ulu-ulu sa medoo sundalu
i Saulo. Migpelaguy da owoy
inuwit da Isbosét i anak i Saulo
migbatas da sa lawa’t Holdan
eg-angay Mahanaim dò.⁹Agulé,
ginelal i Abnél Isbosét i anì
kumeditù diyà tanà Islaél, diyà
tanà Galaad, diyà tanà Asul,
owoy menuwa Héslil, lapeg sa
tanà i Ipelaim owoy sa tanà sa
medoo tugod i Bénhamin.

¹⁰Na egoh iya, epat pulù
gepalay dé sa kelukes i Isbosét

^a2:1 EgoH i Dabid migdineg denu sa kinepatay da i Saulo si Honatan, sinegawan di kagda.

egoh di migpeedung egpedatù diyà tanà Islaél, owoy taman duwa gepalay daa sa lugay di egkamal. Dodoo sa medoo tegeHuda, si Dabid polo sa egdatuen da. ¹¹Owoy migpedatù Dabid i diyà tanà Huda taman pitu gepalay owoy tengà owoy mig-ugpà diyà menuwa Hibelon.

Nesegila Sa TegeIslaél Owoy TegeHuda

¹²Na sebaen agdaw, miglegkang Abnél i lapeg sa medoo etaw i Isbosét kedu diyà menuwa Mahanaim owoy mig-angay da dutu menuwa Gibiyon dò. ¹³Hê, siniegung i Hoab anak i Seluwaya lapeg sa medoo etaw i Dabid kagda dutu siedò Linaw Gibiyon, owoy nesetanà dutu da egpenuu diyà sa kilidan linaw.

¹⁴Na, mig-ikagi Abnél i diyà si Hoab, guwaen di, “Seginaluwen ta sa medoo batàbatà sundalu diyà sa taengan ta.” Agulé migsagbì Hoab i, guwaen di, “Na.”

¹⁵Hê, migtigdeg sa medoo sundalu, owoy nesiesiegung sa sepulù owoy duwa geetaw legkang diyà sa tugod i Bénhamin etaw i Isbosét owoy sepulù owoy duwa geetaw ma sa legkang diyà sa etaw i Dabid. ¹⁶Agulé nesesebabà da ulu owoy nesetebek da guluk diyà sa kabigan da taman sa egoh da nematay langun. Huenan di, pinengadanan da siedò kenà diyà Gibiyon Hélkat Hasulim owoy iya sa selepangan di ‘Kenà sa Neseapatay danà guluk’. ¹⁷Na

egoh iya, egtemù sa kesepatayay da, owoy tinabanan sa medoo etaw i Dabid Abnél i lapeg sa medoo tegeIslaél.

¹⁸Na, dahiya ma sa telu anak i Seluwaya, iya sa ngadan da, si Hoab, si Abisay, owoy si Asahél. Dodoo si Asahél sa tigtu metéél lumetu nekeiling ketéél seladeng. ¹⁹Linohot di Abnél i, owoy endà migtegedon-gedon di egoh di miglohot. ²⁰Huenan di, egoh i Abnél miglalingay, hinaa di Asahél i owoy inigsaan di, guwaen di, “Kuna si Asahél?” Agulé migsagbì, guwaen di, “Hoò, aken.” ²¹Agulé, inikagiyan i Abnél, guwaen di, “Yaka dé eglohot kenak, selab ka denu kuwanan ataw ka denu bibang owoy imatayi ko sa sebaen ma sundalu owoy niko ma dé sa langun kinemkem di.” Dodoo endà migsabuh Asahél i eglohot kenagdi.

²²Agulé, inikagiyan i Abnél dema, guwaen di, “Yaka dé eglohot kenak anì endà imatayan ku kuna. Memala a tumaeng sa duma telehadi ko si Hoab amuk meimatayan ku kuna.” ²³Dodoo endà migsabuh Asahél i eglohot, huenan di ineding i Abnél degdegan sigpù sa getek di, agulé mig-agbas diyà sa iyug di. Hê, nebagtang owoy nematay. Agulé, sa uman sebaen etaw egtalà dahiya, eg-ugpà da owoy egketanengan da egoh da mighaa sa lawa i Asahél nekelagsay.

²⁴Na, egoh i Hoab owoy si Abisay neketiig sa nebaelan, linohot da Abnél i. Egoh di buyu

dé umeled sa agdaw, nekeuma da diyà getan Ama, medapag diyà menuwa Giyah sa dalan eg-angay diyà sa begangbegang sa tanà Gibiyon. ²⁵Agulé sinetipon i Abnél diyà sa pulu tuduk sa medoo sundalu tugod i Bénhamin anì tumapay da diyà sa kegila.

²⁶Hê, mig-umow Abnél i diyà si Hoab, guwaen di, “Ipelagbas ta pa siini kesepatayay? Endà egketiigan ko duu medaet sa metamanan ini i? Nengan ko ya humawid sa medoo etaw ko takà egtelukun sa medoo duma da nesetepeng depanug?”

²⁷Agulé, migsagbi Hoab i, guwaen di, “Ipengibet ku diyà si Datù Nemula nehagtay, amuk endà mig-ikagi ka, tigtu igsugù ku diyà sa medoo etaw ku anì pelagbas da sa kelohot da sa medoo duma da tegeIslaél setepeng depanug taman sumimag.” ²⁸Huenan di, migtegbuli Hoab i. Agulé migsabuh sa medoo etaw di egtelukun sa medoo tegeIslaél owoy mig-etud ma dé sa kesepatayay da.

²⁹Na, neelut sigep sa kineipanaw i Abnél lapeg sa medoo etaw di eg-ukit diyà sa lepak Holdan. Hê, binatas da sa wayeg Holdan, owoy migpekelus da eg-ipanaw taman nekebugsang, agulé nekeuma da diyà menuwa Mahanaim.

³⁰Hê, egoh i Hoab migsabuh egtelukun si Abnél, miglikù lapeg sa medoo etaw di. Agulé egoh di migsetipon kenagda,

iya pelawà neboholon di duen sepulù owoy siyow etaw i Dabid nematay, liyu diyà si Asahél.

³¹Dodoo nekeimatay da telu gatus owoy enem pulù geetaw diyà sa medoo etaw i Abnél anan tugod i Bénhamin. ³²Agulé kinuwa da sa lawa i Asahél owoy iglebeng da diyà sa kenà sa emà di iglebeng diyà Bétléhém. Hê, neelut da sigep mig-ipanaw owoy nesimagan da dé egtebow dutu Hibelon dò.

3 ¹Na, iya sa inedungan sa melugay kesegilaway sa medoo etaw pekimatay diyà si Dabid owoy sa medoo etaw pekimatay diyà si Saulo. Uman egkebagel sa etaw i Dabid dodoo uman polo egkelungoy sa etaw i Saulo.

Ini Sa Medoo Maama Anak I Dabid Neetaw Diyà Hibelon

²Na, ini sa medoo maama anak i Dabid neetaw egoh di eg-ugpà diyà menuwa Hibelon. Si Amnon sa muna anak di diyà sa sawa di si Ahinoam tegeHéslil, ³sa keduwa anak di si Kiliyab anak di diyà sa sawa di si Abigél sa nebalu diyà si Nabal tegeKalmél, owoy sa ketelu di si Absalom anak di diyà si Maaka anak i Datù Talmai tegeGésul, ⁴sa keepat di si Adoniya anak di diyà sa sawa di si Hagit, sa kelima di si Sépatiya anak di diyà sa sawa di si Abital, ⁵owoy sa keenem di si Iteliyam anak di diyà sa sawa di si Égla. Na, kagda sa medoo anak i Dabid neetaw diyà Hibelon.

Eg-ungayà Abnél I Tumampil Diyà Si Dabid

⁶Na, ligò da egkesegila sa medoo etaw i Dabid owoy sa medoo etaw i Saulo, egkedakel sa lalag i Abnél owoy egkebagel ma sa keulu-ulu di diyà sa medoo etaw i Saulo. ⁷Huenan di, apiya sa lagdà sawa i Saulo si Lisper anak i Aya, tinudugan di. Hê, inikagiyan i Isbosét anak i Saulo Abnél i, guwaen di, “Maen di ya egpedumaen ko sa sawa sa emà ku?”

⁸Hê, migbulit Abnél i danà sa inikagi i Isbosét owoy guwaen di, “Iyoh! Egpelagaen ko daa kéen aken tuyang diyà tanà Huda? Taman ini egoh di tapay a doo eg-unung sa malayan i Saulo sa emà ko, owoy diyà sa medoo duma telehadi di lapeg sa medoo loyuk di, owoy endà ma igbegay ku duu kuna diyà si Dabid. Dodoo apiya di pa hediya sa binaelan ku, egtebuan ko doo aken egpedaumà a bayi. ⁹Na, pigtamayan i Datù Nemula hedem aken amuk endà ipetuu ku duu sa pasad di diyà si Dabid. ¹⁰Na, netiigan ku doo igbegay i Nemula sa kedatuan kedu diyà sa tugod i Saulo diyà si Dabid anì kagdi dé sa pedatù diyà tanà Islaél owoy diyà tanà Huda, pelegkang diyà tanà Dan denu gimataan taman diyà menuwa Bélsiba denu belabagan.”

¹¹Agulé endà dé eg-uman di eg-ikagi Isbosét i diyà si Abnél enù ka nelimedangan.

¹²Na, pineangay i Abnél sa medoo etaw di diyà si Dabid

dutu Hibelon dò, anì mikagi da diyà kenagdi, guwaen da, “Kuna sa enget pedatù diyà tanà Islaél. Mael ki sa mesepasadan ta, agulé tabangan ku kuna anì mesakup ko sa langun tanà Islaél.”

¹³Agulé migsagbì Dabid i, guwaen di, “Mepion! Masad a diyà keniko dodoo duen ma sa naken egpegeniyen diyà keniko. Yaka egpehaa ya diyà kenak amuk endà meuwit ko duu sa sawa ku si Mikal anak i Saulo.”

¹⁴Agulé, pineangay i Dabid sa medoo etaw di diyà si Isbosét anak i Saulo anì tulonen da sa kagi di, guwaen di, “Pelikui ko diyà kenak sa sawa ku si Mikal sa sinunggudan ku magatus tanggul ipat sa medoo maama tegePilistiya sa imimatayan ku.”

¹⁵Huenan di, kinuwa i Isbosét Mikal i kedu diyà sa sawa di si Paltiyél anak i Lais. ¹⁶Dodoo mig-unut ma sa sawa i Mikal diyà kenagdi, egsinegaw egsetugdug kenagdi taman nekeuma diyà menuwa Bahulim. Agulé inikagiyan i Abnél Paltiyél i, guwaen di, “Likù ka dé.” Hê, miglikù ma dé Paltiyél i.

¹⁷Na, egoh i Abnél egkeseolom sa medoo ulu-ulu tegeIslaél, inikagiyan di kagda, guwaen di, “Netiigan ku nelugay dé eg-ungayaen yu anì pedatù diyà keniyu Dabid i. ¹⁸Huenan di, baeli yu dé sa inungayà yu, enù ka iya doo sa igpasad i Datù Nemula, guwaen di, ‘Hinemilì ku Dabid i sa egsugùsuguen ku, anì alukan di sa medoo etaw ku kedu diyà sa medoo tegePilistiya

lapeg sa langun egkuntelà kenagda.’ ”

¹⁹Na, inikagiyan i Abnél ma sa medoo tegeBénhamin. Agulé miglagbas diyà sa kenà i Dabid dutu Hibelon dò anì tulonon di sa ungayà sa medoo tegeIslaél lapeg sa medoo tugod i Bénhamin denu sa ketampil da diyà si Dabid. ²⁰Na, egoh i Abnél mig-angay diyà si Dabid, mig-unut ma diyà kenagdi sa duwa pulù etaw di. Agulé, migbael lenggà Dabid i atang diyà kenagda. ²¹Mig-ikagi Abnél i diyà si Dabid, guwaen di, “O Datù, setiponen ku sa langun tegeIslaél diyà keniko, anì mesepasad yu egoh di kuna dé sa datù diyà sa langun tanà Islaél.” Huenan di, pinelikù i Dabid Abnél i owoy mepion sa kinelikù da.

Inimatayan I Hoab Abnél I

²²Na egoh i Abnél nekelegkà dé, migtebow Hoab i lapeg sa medoo etaw i Dabid kedu diyà sa kenà da migpengayaw owoy inuwit da sa medoo nepeka da kedu diyà sa medoo kuntelà da. ²³Aglulé egoh da dumagpak, duen sa migtulon diyà si Hoab denu sa egoh i Abnél mig-angay diyà si Dabid owoy pinelikù di metanà. ²⁴Aglulé, mig-angay Hoab i diyà si Dabid owoy mig-igsà, guwaen di, “Ngadan iya wé binaelan ko? Mig-angay dé Abnél i diyà keniko, dodoo maen di ya pineipanaw ko polo? ²⁵Netiigan ko doo mig-angay dini anì akalan di kuna owoy anì kuhien di sa langun egbaelan ko.”

²⁶Na, egoh i Hoab migsalid diyà si Dabid, igpelohot di Abnél i owoy inuwit da kagdi egpelikù kedu diyà sa paligì diyà Silah. Dodoo endà netiigan i Dabid duu iya wé. ²⁷Hé, egoh i Abnél nekeuma diyà Hibelon, inuwit i Hoab eg-angay diyà sa bengawan sa menuwa enù ka ubòubò duen sa seolomen da duwa. Agulé egoh da dé dutu, petow dé tinebek i Hoab sa getek di, enù ka eggsulian di sa kinepatay i Asahél hadi di. Agulé iya sa igpatay i Abnél.

²⁸Na, egoh i Dabid neketiig denu iya wé, mig-ikagi, guwaen di, “Aken lapeg sa medoo etaw ku, endà duen salà ké diyà si Datù Nemula danà iya wé kepatay i Abnél anak i NéL. ²⁹Dodoo si Hoab owoy sa langun malayan di polo sa mepigtamayan. Hedem endà mekedanan linadu sa malayan di, ataw ka sa liboh endà egkebawu, ataw ka dempid, ataw ka mepikat, ataw ka mematay da danà sundang, ataw ka tebowen da bitil takà.”

³⁰Tuu ma doo, inimatayan i Hoab owoy Abisay hadi di Abnél i enù ka sinulian da sa hadi da sa inimatayan i Abnél egoh sa kesepatayay dutu Gibiyon dò.

Ini Sa Egoh I Abnél Iglebeng

³¹Aglulé inikagiyan i Dabid Hoab i lapeg sa langun дума di, guwaen di, “Kisì yu sa ginis yu owoy kawal yu binekas sakù, danà yu nebukul denu sa kepatay i Abnél.” Egoh iya migsetugdug Datù Dabid i diyà

sa medoo egseoyong lungun.

³²Na, iglebeng da Abnél i dutu Hibelon dò, owoy migdelawit Dabid i lapeg sa langun etaw diyà sa dapag sa lebeng di.

³³Temù nebukul Dabid i danà sa kepatay i Abnél owoy migdelawit, guwaen di,

“Maen di ya nematay daa Abnél i lagà sa kepatay sa etaw dupangdupang?”

³⁴Endà duen sa migpolot sa belad ko owoy endà ma sinangkalan sa lisen ko, dodoo nematay ka lagà sa etaw pinedaetan sa medoo tegebael medaet.”

Agulé migdelawit dema sa langun etaw danà da tigtu nebukul sa kepatay i Abnél.

³⁵Agulé, inimùimù sa medoo etaw Dabid i anì kumaen egoh di endà pa umeled sa agdaw, dodoo migpasad polo Dabid i, guwaen di, “Mepigtamayan i Nemula hedem aken amuk kumaen a epan ataw ka muni dé mekaen, egoh sa agdaw endà pa umeled!”

³⁶Na, netuuwan sa medoo etaw egoh da migdineg iya wé kagi i Dabid, owoy netuuwan da ma danà sa langun binaelan sa datù. ³⁷Huenan di, netiigan sa langun tegeIslaél egoh iya wé agdaw beken duu ungayà sa datù sa kepatay i Abnél.

³⁸Agulé inikagiyan i Dabid sa medoo pineulu-ulu di, guwaen di, “Endà netiigan yu duu kéen siini agdaw nekedan sa sebaen mepion kaunutan diyà tanà Islaél? ³⁹Apiya di pa hinemilì i Nemula aken datù, egkelungoy a

diyà ini i agdaw. Mebagel temù diyà sa kehaa ku siini medoo anak i Seluwaya. Huenan di, si Datù Nemula hedem sa sumulì migtamay kenagda nekeenget diyà sa kedakel sa salà da!”

Ini Sa Egeh I Isbosét Inimatayan

4 ¹Na, egoh i Isbosét anak i Saulo migdineg nematay dé Abnél i dutu Hibelon dò, nekedan sa kebalaw di owoy tigtu nelimedangan ma sa medoo tegeIslaél. ²Na, iya sa ulu-ulu sa medoo tegelampas etaw i Isbosét si Baana owoy si Lékab anak i Limon. Kedu da diyà menuwa Bilot diyà tanà Bénhamin. ³Dodoo sa muna etaw Bilot, migpelaguy da eg-angay dutu menuwa Gitaim dò, owoy mig-ugpà da doo dutu taman ini egoh di apiya di pa beken da tigtu etaw dahiya.

⁴Na, si Honatan anak i Saulo, duen sa anak di pikat, si Mèpébosét. Lima gepalay dé sa kelukes di egoh i Saulo owoy Honatan nematay diyà Héslil danà gila. Agulé egoh sa bayi tegegaet kenagdi migdineg sa tulon, nelimedangan owoy migpelaguy. Danà di migpetéél, nelengaan di sa batà, huenan di nepikat.

⁵Na egoh iya, mig-ipanaw Lékab i owoy Baana anak i Limon tegeBilot eg-angay diyà sa dalesan i Isbosét. Agulé egoh di buyu dé mekebugsang, migtebow da dutu ligò di eg-etud-etud Isbosét i. ⁶⁻⁷Agulé, migludep da diyà sa dalesan owoy ubòubò da kumuwa teligo. Dodoo mig-awoh

da polo diyà sa bilik i Isbosét ligò di egkeneknek egtudug. Hê, sinandak da sa getek di, agulé nematay owoy tinagped da sa lieg di. Hê, migpelaguy da owoy inuwit da sa ulu di. Neelut da sigep eg-ipanaw eg-ukit diyà sa begangbegang. ⁸Hê, inuwit da sa ulu i Isbosét diyà si Dabid dutu Hibelon dò. Agulé mig-ikagi da diyà kenagdi, guwaen da, “Kaini sa ulu i Isbosét anak i Saulo sa kuntelà ko sa egkelukuy eg-imatay keniko. Si Nemula sa migsuli diyà si Saulo owoy sa medoo anak di.”

⁹Agulé sinagbian i Dabid Lékab i owoy si Baana, guwaen di, “Egpasad a diyà si Datù Nemula sa Nemula nehagtay, sa mig-aluk kenak kedu diyà sa langun kelikutan ku. ¹⁰Siedò etaw migtulon diyà kenak nematay dé Saulo i, sa penemdem di mepion sa tinulon di diyà kenak, dodoo sinigkem ku owoy inimatayan ku dutu Siklag dò. Iya sa untung igbegay ku diyà kenagdi danà sa tinulon di. ¹¹Dodoo uman pa sa baelan ku diyà sa medaet etaw lagà keniyu, enù ka inimatayan yu sa mepion etaw diyà sa munoy dalesan di owoy diyà sa hibatan di. Huenan di, ini egoh di imatayan ku kiyu anì kedanan ku kiyu diyà siini uwang tanà.”

¹²Hê, sinugù i Dabid sa medoo sundalu di anì imatayan da Lékab i owoy Baana. Agulé inimatayan da kagda, owoy tinagpedan da kagda belad owoy

lisen, owoy binitin da kagda diyà sa kilidan linaw dutu Hibelon dò. Agulé kinuwa da sa ulu i Isbosét owoy ig-awoh da diyà sa lebeng i Abnél diyà Hibelon.

**Ini Sa Egoh I Dabid Migkedatù
Diyà Sa Tanà Islaél Owoy Tanà
Huda**

5 ¹Na, mig-angay sa langun umpungan tugod i Islaél diyà si Dabid dutu Hibelon dò.^b Egoh da migtebow, guwaen da, “Na kami, beken ké tigesas etaw diyà keniyu, dodoo sebaen daa sa depanug ta. ²Egoh anay egoh di si Saulo pelà sa datù ta, kuna sa mig-uwit sa medoo tegeIslaél amuk eg-angay da eggila. Owoy igpasad i Datù Nemula ma diyà keniko kuna sa umipat sa medoo etaw di tegeIslaél owoy kumematù ka ma diyà kenagda.”

³Agulé egoh sa langun ulu-ulu tegeIslaél nesetipon diyà si Datù Dabid diyà menuwa Hibelon, duen sa nesesapadan binaelan da si Dabid diyà sa taengan i Datù Nemula, owoy hinududan da ma lana anì tandaan da kagdi dé sa datù diyà sa langun tanà Islaél. ⁴Na, telu pulù gepalay dé sa kelukes i Dabid egoh di migkedatù, owoy epat pulù gepalay sa lugay di migkamal. ⁵Dutu menuwa Hibelon dò sa kenà di mig-ugpà egoh di datù diyà tanà Huda taman pitu gepalay owoy tenggà. Agulé mig-ugpà diyà HéIusalém egoh di migkamal sa tanà Islaél lapeg sa tanà Huda taman telu pulù owoy telu gepalay.

^b5:1 Egoh iya, pitu dé gepalay sa lugay i Dabid migkedatù diyà sa menuwa Hibelon.

⁶Na, egoh i Dabid dé datù, inuwit di sa medoo sundalu di anì gilawen da sa medoo tegeHébusiyo diyà menuwa Hélusalém. Pineumàumaan sa medoo tegeHébusiyo Dabid i, guwaen da, “Endà mekeguseb yu dini, enù ka apiya langap owoy pikat daa sa pepelaguy keniyu.” Na, iya sa penemdem da endà mekeawoh Dabid i enù ka tigtu megamel sa kutà nekeulingut diyà sa menuwa da. ⁷Dodoo nekuwa i Dabid doo sa kutà menuwa Siyon. Huenan di, pinengadanan da menuwa i Dabid.

⁸Na, egoh iya agdaw, eg-ikagi Dabid i guwaen di, “Sa umungayà tumepel sa tegeHébusiyo, umukit diyà sa delugan wayeg eg-owoh diyà sa menuwa da, anì tabanan sa medoo ‘pikat owoy langap’ sa medoo kuntelà ta.” Huenan di mig-ikagi da, guwaen da, “Sa ‘langap owoy pikat’ endà mekeawoh di diyà sa dalesan sa datù.”

⁹Agulé mig-ugpà Dabid i diyà sa kutà menuwa Siyon, owoy pinengadanan di menuwa i Dabid. Pinelabel di sa menuwa anì melusud sa menuwa Milo owoy inulingut di ma kutà. ¹⁰Neumanan sa kedatuan i Dabid enù ka si Datù Nemula épê dakek egkegaga sa eg-unut-unut diyà kenagdi.

¹¹Na egoh iya, migpeangay Datù Hilam i tegeTilo diyà si

Dabid sa medoo tegesugkow owoy sa medoo panday egbael kayu owoy batu, anì mulig da mael sa dinelingdingan di. Migpeuwit ma medoo kayu sidelo. ¹²Huenan di, netiigan i Dabid ungayà i Nemula sa kepedatù di owoy migkelabel sa kedatuan di diyà sa medoo etaw i Nemula tegeIslaél.

¹³Na egoh i Dabid mig-edoh diyà menuwa Hélusalém kedu diyà menuwa Hibelon, mig-uman pa eggsawa sa medoo tigtu sawa owoy lagdà sawa, owoy mig-anak medoo maama owoy bayi. ¹⁴Ini sa ngadan sa medoo anak di sa inanak di diyà Hélusalém: si Samuwa, si Sobab, si Natan, si Solomon, ¹⁵si Ibhah, si Élisuwa, si Népeg, si Hapiya, ¹⁶si Élisama, si Éliyada owoy si Élipelét.

Ini Sa Egeh I Dabid Migtabanan Sa Medoo TegePilistiya

¹⁷Na, egoh sa medoo tegePilistiya neketiig datù dé Dabid i diyà tanà Islaél, sinetipon da sa medoo sundalu da anì sigkemen da. Dodoo egoh i Dabid neketiig iya wé, mig-angay eg-awoh diyà sa kutà di. ¹⁸Agulé migkampù sa medoo tegePilistiya owoy nekeseluh da diyà sa lepak Lépaím. ¹⁹Huenan di, mig-igsà Dabid i diyà si Datù Nemula,^c guwaen di, “Enù di ya amuk gilawen ku siini medoo tegePilistiya? Ipelugpì ko pa kagda diyà kenak?”

^c5:19 Mebaluy iya sa ukít di eg-igsà diyà si Nemula danà sa ulim eggamiten sa tegesimbà. Basa ko Éksodo 28:30 owoy Kabilang 27:21.

Migsagbì Datù Nemula i, guwaen di, “Hoò, angay ko dé kagda gila, owoy ipelugpì ku doo kagda diyà keniko.”

²⁰Huenan di, mig-angay Dabid i diyà sa Baal-Pélasim, owoy dahiya sa kenà di miglugpì sa medoo tegePilistiya. Agulé guwaen di, “Tigtu inatuwan i Datù Nemula sa medoo kuntelà ku, enù ka lagà da daa sa tanà inambak sa bekulud sa dakel memahà.” Huenan di, Baal-Pélasim sa kepengadan da iya wé kenà da.^d ²¹Na, egoh sa medoo tegePilistiya nekepelaguy, netagikan da dahiya sa medoo inetaw egpenemulawen da. Agulé kinuwa i Dabid owoy sa medoo etaw di iya wé medoo inetaw.^e

²²Na, apiya di pa nelugpì dé sa medoo tegePilistiya, migpelikù da doo diyà sa lepak Lépaím owoy egtepelen da dema. ²³Huenan di, mig-igsà dema Dabid i diyà si Datù Nemula. Hê, migsagbì Nemula i, guwaen di, “Yoko egdagseg duu denu isaluwan da, dodoo ukit yu polo diyà sa denu iyugan da owoy dagseg yu kagda diyà sa selatal siedò medoo kayu balsamo. ²⁴Angati yu dutu taman sa egoh yu dumineg sa éhê dagì sa medoo etaw egbigkat diyà sa pulu sa medoo kayu. Amuk dinegen yu iya wé, gebek yu dé kagda enù ka humuna a diyà keniyu, aken i Datù Nemula, anì melugpì yu

sa medoo sundalu tegePilistiya.”

²⁵Na, pinangunutan i Dabid iya wé igsugù i Datù Nemula diyà kenagdi. Hê, tigtu linugpì da sa medoo tegePilistiya kumedu diyà menuwa Gibiyon taman diyà menuwa Gésél.

Ini Sa Egoh Da Mig-uwit Sa Baul Tandà Pasad I Nemula Dutu Héluasalém Dò

6 ¹Agulé sinetipon i Dabid dema sa langun mepion sundalu tegeIslaél hinemili di. Telu lagsà sa kedoo da langun. ²Agulé inuwit di kagda eg-angay diyà sa menuwa Baalah diyà tanà Huda anì kuwaen da dahiya sa Baul Tandà Pasad i Nemula. Na, danà siini Baul, egketulengan sa medoo tegeIslaél sa kedatuan i Datù Nemula épê dakel egkegaga, enù ka lagà bangkù di sa neseteliwadaan sa duwa inetaw éhê palas eggsugùsuguen i Nemula migtigdeg diyà sa tagpedan sagpeng di. ³Agulé kinuwa da iya wé Baul diyà sa dalesan i Abinadab diyà sa getan, owoy iglulan da diyà sa kalitun magtu binaelan. Duen sa duwa maama anak i Abinadab, si Usah owoy si Ahiyo sa egtunggù sa kalitun linulanan da sa Baul. ⁴Si Ahiyo sa eg-agak sa duwa sapi eggodoy sa kalitun linulanan da sa Baul. ⁵Na, si Datù Dabid owoy sa langun дума di tegeIslaél, egdelayaw da temù danà da neanggan. Ligò

^d 5:20 Diyà sa kagi Hibelu, iya sa selepangan Baal-Pélasim si Datù Nemula sa mig-atu.

^e 5:21 Igsugù i Dabid anì ulowen da sa medoo inetaw kinuwa da (1 Kelonikas 14:12).

da egduyuy, egkebiten da ma sa medoo dalemotan da owoy duen ma sa medoo liyu dalemotan egbalbalen da.

⁶Na, egoh da nekeuma diyà sa atung kenà i Nakon eg-elik, nekebigkulek sa sapì eggodoy sa kalitun. Hê, sinabaan i Usah sa Baul Tandà Pasad i Nemula anì endà menabù di. ⁷Agulé binulitan i Datù Nemula Usah i danà di migsabà sa Baul. Hê, petow dé minematay diyà sa dapag sa Baul Tandà Pasad i Nemula enù ka pinigtamayan i Nemula.^f

⁸Agulé, migbulit ma Dabid i danà i Datù Nemula migpigtamay si Usah, huenan di pinengadanan da Pélés-Usah iya wé kenà taman ini egoh di. ⁹Na, danà iya wé nebaelan, migpesu Dabid i diyà si Datù Nemula, owoy guwaen di, “Ngadan kéen sa ukit ku eg-uwit ini i Baul Tandà Pasad i Nemula?”

¹⁰Huenan di, endà dé egkeiyapan di duu eg-uwit sa Baul Tandà Pasad i Nemula diyà sa menuwa di. Agulé igpeuwit di polo diyà sa dalesan i Obéd-Idom tegeGat.

¹¹Na, telu gebulan sa lugay sa Baul Tandà Pasad i Nemula diyà sa dalesan di. Hê, binagian i Datù Nemula Obéd-Idom i owoy sa langun malayan di lugay sa Baul Tandà Pasad diyà kenagdi.

¹²Na, tinulonon da Datù Dabid i, guwaen da, “Binagian i Datù

Nemula sa langun malayan i Obéd-Idom owoy sa langun egbaelan di ma danà sa Baul Tandà Pasad i Nemula diyà kenagdi.” Huenan di, inangay i Dabid dema egkuwa sa Baul Tandà Pasad i Nemula kedu diyà sa dalesan i Obéd-Idom. Egoh da eg-uwit duu diyà sa Menuwa i Dabid, sineoyongon da owoy tigtu neanggan sa medoo tegeIslaél.

Ini Sa Binaelan I Dabid Egoh Da Mig-uwit Sa Baul Tandà Pasad I Nemula

¹³Na, egoh da eg-ipanaw enem pà geligkowot sa inukitan da egoh da mig-uwit sa Baul Tandà Pasad, pineetud i Dabid sa langun etaw owoy mig-ulow da pelawà hinagtay ibegay diyà si Nemula, sebaen tudu sapì owoy nati sapì megebù. ¹⁴Agulé migdelayaw Dabid i taman sa ungayà di diyà sa taengan i Datù Nemula. Igginis di sa ginis tegesimbà, beken sa ginis datù. ¹⁵Hê, inuwit i Dabid owoy sa medoo tegeIslaél sa Baul Tandà Pasad i Datù Nemula ligò da egpetibos owoy egtegbuli.

¹⁶Na, egoh sa Baul Tandà Pasad dé eg-awoh diyà sa menuwa i Dabid, egtataw Mikal i anak i Saulo owoy hinaa di Dabid i egpebalukbaluk egdelayaw diyà sa taengan i Datù Nemula. Agulé egkelanggetan pedu di Dabid i.

^f6:7 Duen sa uledin i Nemula diyà Kebilang 4:4-15 anì endà duen etaw eggsabà sa Baul sa Tandà Pasad i Nemula enù ka mapulù diyà sa kehaa i Nemula. Amuk ungayà da halien da, iya daa sa mebaluy umuwit sa medoo tegesimbà tugod i Lebi owoy seoyongon da. Nematay Usah i danà di endà migpangunut diyà sa uledin.

^g6:8 Iya sa selepangan sa Pélés-Usah diyà sa kagi Hibelu si Usah nepigtamayan.

¹⁷Hê, ig-awoh da sa Baul Tandà Pasad diyà sa tolda binaelan i Dabid. Migbegay da uloy diyà si Nemula sa eg-ulowen owoy sa medoo igbegay denu sa keseloyukay si Nemula. ¹⁸Hê, egoh i Dabid neubus egbegay uloy, igsembà di sa langun etaw danà sa ngadan i Datù Nemula sa tigtu miglowon diyà langun. ¹⁹Agulé binegayan di epan, kaleni owoy sa sig-ekupay netikal bunga keleg palas sa medoo maama owoy bayi tegeIslaél. Agulé miglikù sa langun etaw.

²⁰Hê, miglikù ma Dabid i anì isimbà di ma sa hagdi munoy malayan. Tinelabuk i Mikal Dabid i owoy inikagiyan di, guwaen di, “Tigtu meolò lakê sa datù tegeIslaél diyà siini agdaw enù ka buyu dé egpelawalawa egdelayaw diyà sa taengan sa medoo bayi udipen sa medoo pineulu-ulu di. Sa etaw bunegbuneg daa sa mael éhê iya wé!”

²¹Agulé sinagbian i Dabid Mikal i, guwaen di, “Binaelan ku ini i diyà sa taengan i Datù Nemula sa mighemilì kenak uman pa diyà sa emà ko, owoy uman pa diyà sa malayan sa medoo tugod di. Ginelal di aken datù diyà sa langun tegeIslaél sa medoo etaw i Datù Nemula, huenan di egkeanggan a diyà sa taengan di. ²²Dodoo baelan ku pa uman sa tigtu mekemala diyà ini i, sa mekemala diyà sa kehaa ko. Dodoo sa medoo bayi egsugùsuguen sa inikagi ko, oloen da polo aken.”

²³Na, endà mig-anak Mikal i taman sa egoh di nematay.

Ini Denu Sa Pasad I Nemula Diyà Si Dabid

7 ¹Na, metanà dé sa keugpà i Dabid diyà sa dinelingdingan di, owoy endà dé duen etaw eggila kenagdi danà sa ketabang i Datù Nemula kenagdi. ²Huenan di, mig-ikagi Dabid i diyà si Natan sa tegesugkow kagi i Nemula, guwaen di, “Taa ko, dahini a eg-ugpà diyà sa metolol dinelingdingan linigoligowon sa papan anan kayu sidelo. Dodoo diyà pelawà tolda sa Baul Tandà Pasad i Nemula.”

³Migsagbi Natan i, guwaen di, “Mepion doo sa egkelukuyan ko egbael. Huenan di, baeli ko dé, enù ka netiigan ku eg-unut-unut Datù Nemula i diyà keniko.”

⁴Na, sebaen sigep mig-ikagi Datù Nemula i diyà si Natan, ⁵guwaen di, “Ikagiyi ko sa egsugùsuguen ku si Dabid, guwaen ko, ‘Ini sa kagi i Datù Nemula, guwaen di: Kuna pa sa mael dalesan kenà ku umugpà? ⁶Endà pa nekeugpà a diyà sa dalesan edung sa egoh ku mig-uwit sa medoo tegeIslaél kedu tanà Igiptu dò taman ini egoh di. Eghalihali a daa eg-ugpà diyà sa tolda. ⁷Diyà sa langun kenà ku mig-unut diyà sa medoo tegeIslaél, endà migselsel a apiya sebaen daa kagi diyà sa medoo datù tegeIslaél sa sinugù ku umipat sa medoo etaw ku. Migsugù a pa atu anì baelan da aken dalesan anan kayu sidelo?’ ”

⁸Na, guwaen i Nemula ma, “Tuloni ko sa egsugùsuguen ku si Dabid, guwaen ko, ‘Ini sa kagi i Datù Nemula épê dakel egkegaga: Kinuwa ku kuna kedu diyà sa petabtaban kenà ko eg-ipat kebilibili anì gelalen ku kuna datù diyà sa medoo etaw ku tegeIslaél. ⁹Eg-unut-unut a diyà keniko sumalà dé sa inangayan ko, owoy igpelugpì ku keniko sa langun kuntelà ko. Owoy gantungen ku sa ngadan ko, nekeiling sa lalag sa medoo dakel etaw diyà siini uwang tanà. ¹⁰Binegayan ku dé tanà sa medoo etaw ku tegeIslaél, owoy peugpaen ku kagda dahiya anì dumuen sa hagda munoy tanà anì endà dé mebogo da etaw. Endà dé mepedaetan di sa medoo medaet etaw kagda lagà sa nebaelan da egoh anay ¹¹edung sa egoh ku mighemilì sa medoo tegekukum diyà sa medoo etaw ku. Agulé, endà dé ipebogo ku duu kuna diyà sa medoo kuntelà ko.

“Na, guwaen i Datù Nemula ma, ‘Aken si Datù Nemula eg-ikagi ini i: Pekelus pedatù sa sebaen tugod ko. ¹²Agulé amuk mematay ka owoy ilebeng ka diyà sa lebengan sa medoo tupù ko, gelalen ku datù sa sebaen anak ko owoy pebagelen ku ma sa kedatuan di. ¹³Kagdi polo sa petigdeg sa dalesan kenà di meolò sa ngadan ku owoy pedatuen ku sa medoo tugod di taman melugay. ¹⁴Mebaluy aken sa meemà di owoy kagdi sa meanak ku. Amuk mekesalà, indawan ku kagdi lagà sa

keindaw sa emà di diyà sa anak di. ¹⁵Dodoo tapay doo hiduwan ku kagdi, beken iling sa binaelan ku diyà si Saulo, sa datù kenà ko nekesambì. ¹⁶Pedoowen ku sa tugod ko owoy sa kedatuan ko ma anì meolò a taman melugay.’”

¹⁷Hê, tinulon i Natan diyà si Dabid sa langun igpetiig i Nemula diyà kenagdi.

Ini Sa Egoh I Dabid Migsimbà

¹⁸Agulé, mig-awoh Dabid i diyà sa tolda kenà sa Baul Tandà Pasad i Nemula. Migpenuu dahiya owoy migsimbà, guwaen di, “O Datù Nemula, ngadan ku daa aken i? Ngadan di daa sa malayan ku sa egtabangan ko taman ini egoh di? ¹⁹Dodoo tukééy daa ini i diyà keniko, O Datù Nemula! Enù migbael ka pa pasad diyà sa medoo tugod ku anì kumedità da diyà sa medoo palay pa tumebow? Dodoo endà éhê di ini sa binaelan ko diyà sa liyu etaw, o Datù Nemula! ²⁰Owoy ngadan di pa sa meikagi ku diyà keniko, o Datù Nemula, enù ka netiigan ko doo sa keetawan ku, aken i egsugùsuguen ko? ²¹Danà sa pasad ko owoy sa ungayà ko, binaelan ko siini medoo egkegaipan owoy igpetiig ko diyà kenak, aken i egsugùsuguen ko.”

²²Guwaen i Dabid ma, “O Datù Nemula, tigtu ka tunungan. Endà duen liyu neketepeng diyà keniko, enù ka kuna daa sa tigtu Nemula. Anan tuu sa langun dinineg ké denu keniko.

²³Endà duen liyu balangan etaw diyà siini uwang tanà sa neketepeng diyà sa etaw ko tegeIslaél sa inalukan ko egoh da neudipen anì mebaluy kagda sa meetaw ko. Miglalag ka danà ko migbael sa dakel owoy mekegaip medoo panduan, egoh ko mighemagawan sa medoo liyu balangan etaw lapeg sa medoo egpenemulawen da danà ko mig-alukan sa medoo etaw ko kedu diyà tanà Igiptu. ²⁴Hinemilì ko sa medoo tegeIslaél anì mebaluy etaw ko taman melugay, owoy kuna, o Datù Nemula, sa menemula da.

²⁵“Na ini egoh, o Datù Nemula, petuuwi ko sa medoo pasad ko diyà kenak i egsugùsuguen ko, owoy diyà sa malayan ku ma taman melugay, ²⁶anì meolò ka sa langun etaw diyà siini sinukub langit, agulé mikagi da, guwaen da, ‘Si Datù Nemula épê dakel egkegaga sa Datù sa medoo tegeIslaél.’ Agulé petigdeg ko diyà sa taengan ko taman melugay sa malayan sa egsugùsuguen ko, si Dabid.”

²⁷Mig-uman egsimbà Dabid i, guwaen di, “O Datù Nemula épê dakel egkegaga, sa Nemula sa tegeIslaél, igpetiig ko ini i diyà kenak, aken i egsugùsuguen ko, guwaen ko, ‘Gelalen ku datù sa medoo tugod ko.’ Iya sa pesuwan di egkebagel sa pedu ku egsimbà diyà keniko. ²⁸O Datù Nemula, kuna daa sa tigtu Nemula. Igpasad ko siini medoo mepion

diyà kenak, aken i egsugùsuguen ko, owoy tigtu kesaligan sa medoo pasad ko. ²⁹Huenan di, ungayà ku mebegayan ko bagi sa malayan ku, anì taman melugay sa kedatuan sa tugod ku. Enù ka tapay dé iya sa igpasad ko, o Datù Nemula, owoy netiigan ku begayan ko mepion bagi sa malayan ku taman melugay.”

Ini Denu Sa Medoo Ketaban I Dabid

8 ¹Agulé nelugaylugay egoh iya, tigtu dé nelugpì i Dabid sa medoo tegePilistiya owoy inudipen di kagda. Nepeka di diyà kenagda sa menuwa Métég Ama.

²Agulé nelugpì i Dabid ma sa medoo tegeMoab owoy pinehibat di kagda diyà tanà owoy tinembu di kagda tali. Inimatayan di sa nekeawoh diyà sa duwa lipo, hê sa nekeawoh diyà sa ketelu di lipo egpandayaen di mehagtay. Huenan di, inudipen i Dabid sa medoo nesamà tegeMoab owoy egbegay da buwis diyà kenagdi.

³Hê, nelugpì i Dabid ma Hadadésél i anak i Léhob sa datù diyà menuwa Soba egoh i Hadadésél egpebagel sa kesabà di sa tanà medapag diyà Wayeg Upelatis. ⁴Huenan di, sinigkem i Dabid sa medoo etaw i Hadadésél, sengibu owoy pitu gatus sundalu egkudà^howoy duwa pulù ngibu sundalu eg-ipanaw tanà. Hê, pineka di

^h 8:4 Diyà 1 Kelonikas 18:4, iya sa sinigkem di sa sengibu kalitun eggila owoy pitu ngibu etaw tegeuwit kalitun eggila.

sa medoo kudà da eggodoy sa kalitun eggila, dodoo migsamà daa magatus kudà atang gumodoy sa kalitun eggila.

⁵Na, egoh sa medoo tegeAlam diyà menuwa Damasko mig-angay egbulig diyà si Datù Hadadésél, inimatayan i Dabid sa duwa pulù owoy duwa ngibu diyà kenagda. ⁶Agulé tinenaan i Dabid kampù sundalu sa menuwa Damasko diyà tanà Alam. Agulé inudipen i Dabid kagda owoy pinebayad di kagda buwis. Tuu ma doo, pinetaban i Datù Nemula Dabid i sumalà dé sa eg-angayan di egpengayaw.

⁷Na, nepeka i Dabid sa medoo kelasag bulawan sa medoo ulu-ulu sundalu i Hadadésél, agulé inuwit da dutu Héluasalém dò. ⁸Kinuwa i Dabid ma sa medoo galang kedu diyà menuwaⁱBéta owoy diyà menuwa Bélotay, sa nesakupan sa kedatuan i Hadadésél.

⁹Na, egoh i Datù Toy tegeHamat migdineg denu sa kinetaban i Dabid sa langun sundalu i Hadadésél, ¹⁰pineangay di Holam i anak di diyà si Datù Dabid anì oloen di kagdi owoy angganen di ma denu sa kinetaban di si Hadadésél, enù ka takà da egkesegila Toy i owoy si Hadadésél egoh anay. Mig-uwit Holam i diyà si Dabid sa medoo igpeuloy sa medoo pilak, medoo bulawan owoy medoo galang.

¹¹Na, siini langun taman igbegay da diyà si Dabid,

igpeépê di diyà si Datù Nemula, lagà sa kinebael di sa medoo pilak owoy sa medoo bulawan sa nepeka di diyà sa medoo liyu kedatuan nelugpi di. ¹²Igbegay di ma sa nepeka di kedu diyà si Datù Hadadésél anak i Datù Léhob tegeSoba. Na ini sa medoo kedatuan nelugpi di, sa kedatuan sa tegeIdom, owoy sa tegeMoab, owoy sa tegeAmon, owoy sa tegePilistiya, owoy sa tegeAmalék, lapeg sa kedu diyà si Datù Hadadésél tegeSoba anak i Léhob.

¹³Neumanan sa lalag i Dabid egoh di nekepatay sa sepulù owoy walu ngibu tegeIdom dutu siedò sugud kepengadan da sugud Timus. ¹⁴Agulé pinetigdegan di medoo kampù sundalu di sa tanà Idom, owoy inudipen di sa langun etaw dahiya. Pinetaban i Datù Nemula Dabid i sumalà dé sa inangayan di eggila.

Ini Sa Medoo Pineulu-ulu I Dabid

¹⁵Na, migkamal Dabid i diyà sa langun tanà Islaél. Enget owoy metudà sa egbaelan di diyà sa langun etaw di. ¹⁶Na, si Hoab anak i Seluwaya sa ulu-ulu sa medoo sundalu di, owoy si Héhosapat anak i Ahilud sa tegeipat sa medoo sulat denu sa kedatuan. ¹⁷Na, sa duwa tegesimbà si Sadok anak i Ahitub owoy si Ahimélék anak i Abiyatal. Si Sélaya sa tegesulat. ¹⁸Owoy si Bénaya anak i Héhoyada sa ulu-ulu sa medoo

ⁱ8.8 Sa menuwa Téba sa ngadan di diyà 1 Kelonikas 18:8.

sundalu atung egbantay si Dabid. Owoy sa medoo maama anak i Dabid sa medoo tegedadan'di.

Ini Sa Binaelan I Dabid Diyà Si Mépibosét

9¹Na, sebaen agdaw mig-ikagi Dabid i diyà sa medoo etaw di, guwaen di, “Duen pa sa nesamà tugod i Saulo anì ipehaa ku diyà kenagdi sa kehidu ku danà sa loyuk ku si Honatan?”

²Agulé igpeumow i Dabid sa sebaen etaw si Siba, sa tapay egsugùsuguen sa malayan i Saulo. Egoh di migdapag, inigsaan di, guwaen di, “Kuna pa si Siba?”

Migsagbì, guwaen di, “Hodò, o Datù.”

³Hê, mig-igsà dema Dabid i, guwaen di, “Duen pa sa liyu nesamà diyà sa malayan i Saulo anì ipehaa ku diyà kenagdi sa kehidu i Nemula?”

Migsagbì ma Siba i, guwaen di, “Duen pa sa sebaen anak i Honatan, dodoo nepikat.”

⁴Mig-uman Datù Dabid i eg-igsà, guwaen di, “Kenà di ya ini egoh di?”

Migsagbì Siba i, guwaen di, “Daya doo diyà sa dalesan i Makil anak i Amiyél eg-ugpà dutu menuwa Lo Débal dò.”

⁵Agulé, igpeangay i Datù Dabid Mépibosét i kedu diyà menuwa Lo Débal.

⁶Na, si Mépibosét sa anak i Honatan owoy bébê i Saulo. Agulé mig-angay egtaeng diyà si Dabid owoy migkudung.

Mig-ikagi Dabid i, guwaen di, “O Mépibosét!” Hê migsagbì, guwaen di, “Kaini a doo aken i egsugùsuguen ko.”

⁷Agulé guwaen i Dabid i diyà kenagdi, “Yaka egkelimedangan na enù ka eghiduwan ku kuna danà sa nesepasadan ké sa emà ko si Honatan. Ipelikù ku diyà keniko sa langun tanà i Saulo sa bébê ko, owoy beken iya daa enù ka mekeunut ka ma kenak uman a kumaen.”

⁸Agulé, igduemel i Mépibosét sa kilay di diyà tanà, owoy guwaen di, “Ngadan di daa aken i egsugùsuguen ko egpehauwan ko kehidu, ki lagà a daa sa tuyang nematay?”

⁹Agulé igpeumow i Dabid Siba i owoy inikagiyam di, guwaen di, “Sa langun taman i Saulo owoy sa malayan di, ibegay ku diyà sa bébê sa datù ko. ¹⁰Hê, kuna owoy sa medoo anak ko lapeg sa medoo egsugùsuguen ko, humemula yu atang diyà kenagdi. Agulé uwit ko diyà kenagdi sa langun nekuwa ko diyà sa hinemulaan yu, anì duen sa mekaen sa datù ko. Dodoo si Mépibosét, kagdi sa duma ku kumaen dini diyà sa dalesan ku. (Na si Siba, duen sepulù owoy lima anak di maama owoy duwa pulù sa egsugùsuguen di.)

¹¹Agulé migsagbì Siba i diyà si Dabid, guwaen di, “Baelan ku sa langun igsugù ko diyà kenak denu sa datù ku.” Dodoo egpeunut Mépibosét i egkaen duma sa datù lagà anak di.

8:18 Diyà 1 Kelonikas 18:17, sa medoo maama anak i Dabid sa medoo tegesimbà.

¹²Na, duen sa maama anak i Mépibosét si Mika, owoy nebaluy egsugùsuguen i Mépibosétsa langun eg-ugpà diyà sa dalesan i Siba. ¹³Na, mig-ugpà Mépibosét i diyà menuwa Héluasalém enù ka takà eg-unut diyà sa datù egkaen owoy nepikat sa duwa lisen di.

Ini Sa EgoH I Dabid Miglugpi Sa Medoo TegeAmon

10 ¹Na, egoh di melugaylugay, nematay Nahas i sa datù sa medoo tegeAmon. Agulé si Hanun anak di sa nekesambì kenagdi egpedatù. ²Hê, mig-ikagi Datù Dabid i, guwaen di, “Ipehaa ku diyà si Hanun sa ke pion ku, enù ka mepion sa binaelan sa emà di diyà kenak.” Huenan di, migpeangay Dabid i sa medoo pineulu-ulu di anì ipetulon di diyà si Hanun sa medaet pedu di danà sa emà di nematay.

Agulé, egoh sa medoo etaw i Dabid migtebow diyà sa tanà sa tegeAmon, ³mig-ikagi sa medoo pineulu-ulu sa tegeAmon diyà si Hanun sa datù da, guwaen da, “Egpenemdem ka pa eg-adatan i Dabid sa emà ko pineukit sa kepeangay di sa medoo etaw anì ipetulon di sa medaet pedu di danà sa emà ko nematay? Beken atu, pineangay i Dabid polo kagda diyà keniko anì timbulen da owoy kuhien da sa menuwa anì pedaetan sa medoo tegeIslaél?” ⁴Huenan di, sinigkem i Hanun sa medoo etaw i Dabid. Hê, inul-ul di sa dibaluy’t benget sa uman sebaen diyà kenagda, owoy kineleng

di ma sa kawal da diyà sa teliwadaan sa denu punuk da, agulé pinelikù di kagda.

⁵Na, egoh i Dabid netulonon denu ini i, migpeangay sa medoo tegesugkow anì siegungen da kagda enù ka tigtu da nemalaan. Mig-ikagi sa datù, guwaen di, “Ugpà yu pelawà diyà Héliko taman tumubù sa benget yu, agulé pelikù yu dini.”

⁶Na, egoh sa medoo tegeAmon neketiig sa egoh di tigtu pinebulit da Dabid i, sinukayan da sa duwa lagsà sundalu tegeAlam kedu diyà menuwa Bet-Léhob owoy Soba, lapeg sa sengibu kedu diyà sa datù tegeMaaka owoy sa sepulù owoy duwa ngibu ma kedu diyà menuwa Tob.

⁷Hê, egoh i Dabid migdineg denu ini i, pineangay di Hoab i owoy sa langun mebalaw sundalu di anì gilawen da kagda. ⁸Agulé miglaun sa medoo sundalu tegeAmon, owoy nesediding da diyà sa bengawan sa menuwa da, ligò di sa medoo tegeAlam kedu diyà menuwa Soba owoy Lélob owoy sa medoo sundalu tegeTob owoy tegeMaaka inumpung da kagda owoy migtapay da diyà sa sugud-sugud.

⁹Hê, egoh i Hoab mighaa sa medoo kuntelà di diyà sa denu isaluwan di owoy diyà sa denu iyugan di ma, hinemilì di sa medoo sundalu tegeIslaél tigtu nelayam eggila owoy pinetapay di kagda anì atuwan da sa medoo tegeAlam. ¹⁰Hê, sa duma sundalu di, igpepangulu di si

Abisay hadi di owoy pinetapay di kagda anì atuwan da sa medoo tegeAmon. ¹¹Na, mig-ikagi Hoab i diyà si Abisay, guwaen di, “Amuk mebagel temù diyà kenak sa medoo tegeAlam, tabangi yu aken. Dodoo amuk sa medoo tegeAmon polo sa mebagel diyà keniya, tabangan ku ma kiyu. ¹²Pebalaw yu! Umatu ki owoy ipehaa ta sa kebagel ta owoy umatu ki ma danà sa medoo etaw ta owoy danà sa medoo menuwa sa Nemula ta. Baelan i Nemula sa mepion diyà sa kehaa di.”

¹³Agulé migdagseg Hoab i owoy sa medoo дума di, hê migpelaguy sa medoo tegeAlam. ¹⁴Na, egoh sa medoo tegeAmon mighaa migpelaguy sa medoo tegeAlam, migpelaguy da ma kedu diyà si Abisay eg-angay diyà sa menuwa da. Huenan di, miglikù Hoab i kedu diyà sa kegila di sa medoo tegeAmon owoy mig-angay Hélusalém dò.

¹⁵Hê, egoh sa medoo tegeAlam neketiig sa egoh da netabanan sa medoo tegeIslaél, egsetiponoy da dema. ¹⁶Binuligan sa medoo liyu tegeAlam kagda sa igpekuwa i Hadadésél kedu diyà sa tanà dutu wayeg Upelatis. Mig-angay da Hélam dò, hê si Sobak sa migpangulu kenagda owoy kagdi sa kapitan sa medoo sundalu i Hadadésél.

¹⁷Na, egoh i Dabid neketiig ini i, sinetipon di sa langun sundalu tegeIslaél anì gumila da. Agulé migbatas da sa wayeg Holdan owoy mig-angay da Hélam dò. Hê, migtapay sa medoo

tegeAlam anì atuwan da Dabid i, agulé nesegila da. ¹⁸Dodoo migpelaguy polo sa medoo tegeAlam. Hê, nekeimatay da Dabid i pitu gatus etaw eg-uwit kalitun eggila owoy epat lagsà sundalu tegekudà. Inimatayan di ma Sobak i sa kapitan sa medoo sundalu tegeAlam. ¹⁹Na, egoh sa medoo datù tegeAlam sa nesakupan i Hadadésél neketiig sa egoh da netabanan sa medoo tegesIslaél kagda, migtampil da diyà sa medoo tegesIslaél owoy migpesakup da diyà kenagda.

Huenan di edung egoh iya, nelimedangan sa medoo tegeAlam egtabang diyà sa medoo tegeAmon.

Ini Sa Denu Si Dabid Owoy Si Batséba

11 ¹Na, egoh di neuma dema sa sebaen magtu palay sa mepion gai kesegilaway sa medoo datù, sinugù i Dabid dema Hoab i owoy sa medoo kapitan sundalu lapeg sa langun sundalu tegeIslaél anì mangay da gumila. Agulé linugpi da sa medoo tegeAmon owoy sineulingutan da ma sa menuwa Laba. Dodoo eg-ugpà daa Dabid i diyà menuwa Hélusalém.

²Na sebaen mahapun, migtudug Dabid i. Agulé egoh di mig-enaw, miggemow diyà sa mepatag atep sa dinelindingan di owoy egbigkatbigkat dahiya. Hê, nesugpayalan di sa tigtu metolol bayi egpedigus. ³Huenan di, mig-igsà anì metiigan di ngadan iya wé bayi. Agulé duen sa migtulon

diyà kenagdi, guwaen di, “Si Batséba atu anak i Iliyam, sawa i Uliyas sa tegeHétiyo.”

⁴Agulé igpeangay i Dabid sa bayi, hê mig-angay sa bayi diyà si Dabid. Na, magtu daa neubus migpelanìh danà di migpangunut diyà sa uledin da denu sa egoh da eghaa’t gai adat bayi. Hê, neseuma da lawa si Dabid, agulé miglikù dé sa bayi. ⁵Na, danà iya wé binaelan da, migkelalìngen Batséba i, agulé igpetulon di diyà si Dabid sa egoh di obol dé.

⁶Na, egoh i Dabid neketiig iya wé, pineuwitan di kagi Hoab i sa tigtu ulu-ulu sa medoo sundalu di anì pelikuen di diyà Hélusalém Uliyas i tegeHétiyo sawa i Batséba. ⁷Agulé egoh i Uliyas migtebow, inigsan i Dabid, guwaen di, “Enù egoh sa egkebaelan i Hoab owoy sa langun sundalu ta?” Owoy inigsà di ma denu sa kegila da. ⁸Agulé mig-ikagi diyà si Uliyas, guwaen di, “Mepion doo amuk lumagbas ka pelawà diyà sa dalesan yu anì mekeetud-etud ka.” Huenan di, miglegkang Uliyas i. Hê, duen ma sa igpeuloy i Dabid igpelohot di diyà sa dalesan i Uliyas. ⁹Dodoo endà miglagbas Uliyas i diyà sa hagdi dalesan. Migtudug polo diyà sa bengawan sa dinelingdingan i Dabid sa atung kenà sa medoo tegebantay egtudug.

¹⁰Agulé egoh i Dabid neketiig endà miglagbas Uliyas i diyà sa dalesan di, inikagiyan di, guwaen di, “Magtu ka daa migtebow kedu mediyù dò,

maen di ya endà eglagbas ka diyà sa dalesan yu?”

¹¹Migsagbì Uliyas i, guwaen di, “Sa Baul Tandà Pasad i Nemula owoy sa medoo sundalu tegeIslaél owoy sa medoo sundalu tegeHuda, eg-ugpà da daa diyà sa kampù diyà sa kenà da eggila. Mediyù dalesan sa kenà da egtudug sa ulu-ulu ku si Hoab owoy sa langun sundalu ko. Enù di ya, mangay a pa diyà sa dalesan ku anì kumaen a owoy uminem a owoy anì mesehulid ké sa sawa ku? Egpengibet a diyà keniko, endà baelan ku duu iya wé.”

¹²Agulé mig-ikagi Dabid i diyà si Uliyas, guwaen di, “Ugpà ka pelawà dini ini egoh di, enù ka peipanawen ku pa kuna simag.” Huenan di, mig-ugpà Uliyas i diyà Hélusalém egoh iya wé agdaw owoy taman simag. ¹³Inenggat i Dabid ma egkaen diyà sa kenà di owoy linangut di ma. Dodoo endà doo miglikù Uliyas i egoh iya wé sigep. Migtudug polo diyà siedò atung kenà sa medoo tegebantay egtudug.

¹⁴Agulé egoh di sumimag, sinulatan i Dabid Hoab i owoy igpeuwit di diyà si Uliyas. ¹⁵Iya sa igsulat di, guwaen di, “Pedenu ko Uliyas i diyà sa medoo mebalaw kuntelà yu, agulé peesud-esud ko sa medoo sundalu duma di anì meimatayan.”

¹⁶Huenan di, egoh da i Hoab eggila diyà menuwa Laba, pinedenu di Uliyas i diyà sa netiigan di mebalaw kuntelà

da. ¹⁷Agulé egoh sa medoo kuntelà da miglaun kedu diyà sa menuwa da, egsegilaway da sa medoo sundalu i Hoab. Hê, duen medoo sundalu i Datù Dabid inimatayan da, lapeg si Uliyas tegeHétiyo.

¹⁸Na, migpeuwit Hoab i diyà si Dabid sa negulub tulon denu sa nebaelan diyà sa gila. ¹⁹Igbegay di diyà sa tegesugkow sa nedidi sugù, guwaen di, “Amuk ubus tinulon ko diyà sa datù siini langun nebaelan diyà sa kesegilaway, ²⁰kéén mulit owoy igsaan di kuna, guwaen di, ‘Maen di ya migpedapag yu temù diyà sa kutà menuwa anì gumila? Endà neketiig yu atu panaen da kiyu kedu diyà sa kutà? ²¹Netulengan yu pa atu sa igpatay i Abimélék anak i Hélu-Bését? Beken atu tinuleng sa bayi sa gilingan batu kedu lekeatas sa kutà dutu Tébéés dò, huanan di nematay? Na, maen di ya migpedapag yu diyà sa kutà?’ Na, amuk igsaan di kuna iling ini i, ikagi ka diyà kenagdi, guwaen ko, ‘Nematay ma sa egsugùsuguen ko si Uliyas tegeHétiyo.’”

²²Agulé mig-ipanaw sa tegesugkow, owoy egoh di migtebow tinulonon di Dabid i sa langun inikagi i Hoab. ²³Mig-ikagi sa tegesugkow diyà si Dabid, guwaen di, “Dinagseg sa medoo kuntelà kami diyà sa sugud-sugud, dodoo linohot ké kagda pelikù diyà sa bengawan sa menuwa da. ²⁴Agulé sa medoo tegepanà diyà sa kutà, pinanà da kami. Hê, nematay sa

medoo duma sundalu ko lapeg sa egsugùsuguen ko si Uliyas tegeHétiyo.”

²⁵Agulé mig-ikagi Dabid i diyà sa tegesugkow, guwaen di, “Ikagiyi ko Hoab i anì endà mebukulan di duu sa nebaelan enù ka endà netiigan ta duu sa mematay diyà sa kesegilaway. Pebagelen di polo sa kedagseg di sa menuwa anì medaetan. Ikagi ko ini i anì kumebagel Hoab i.”

²⁶Na, egoh i Batséba migdineg denu sa kinepatay sa sawa di, sininegawan di. ²⁷Agulé egoh di migsabuh egdelawit, igpeangay i Dabid dé Batséba i enù ka sawaen di. Agulé egoh di miglesut sa inobol di, maama sa anak di. Dodoo endà netuuwan Datù Nemula i diyà sa binaelan i Dabid.

Ini Sa Egoh I Dabid Nesenulé

12 ¹Na, pineangay i Datù Nemula Natan i sa tegesugkow kagi di diyà si Dabid. Egoh di migtebow, mig-ikagi diyà si Dabid, guwaen di, “Duen sa duwa maama eg-ugpà diyà sa sebaen daa menuwa. Kawasà sa sebaen owoy pubeli sa sebaen. ²Duen medoo kebilibili owoy medoo sapi sa kawasà. ³Dodoo sa pubeli, sebaen daa sa hagdi nati kebilibili bayi bineli di. Mepion sa keipat di lagà medaa sa keipat di sa medoo anak di. Egsepipiyen di lagà sa bayi anak di owoy ipekaen di ma sa duma egkaenen di owoy peinemen di ma diyà sa hagdi tabù. ⁴Na, sebaen agdaw duen sa etaw kedu mediyù dò migtebow

diyà sa dalesan sa kawasà etaw. Dodoo endà egkeiyapan di duu egsumbalì sa hagdi munoy hinagtay. Huenan di, iya polo sa kinuwa di sa kebilibili sa pubeli etaw owoy sinumbalì di anì imengana di diyà sa etaw migtebow.”

⁵Na, egoh i Dabid migdineg iya wé, tigtu binulitan di sa etaw kawasà, owoy guwaen di diyà si Natan, “Ipengibet ku danà di melalù Datù Nemula i, mepion amuk meimatayan sa etaw migbael iya wé. ⁶Owoy pebayaden ta epat gulê metakep lagà sa kinuwa di, enù ka endà eghiduwan di duu sa etaw pubeli.”

⁷Agulé mig-ikagi Natan i diyà si Dabid, guwaen di, “Kuna sa pineligadan ku sa etaw kawasà. Na, dineg ko sa kagi i Datù Nemula, sa Nemula epgigtuuwen sa medoo tegeIslaél. Guwaen i Nemula diyà keniko, ginela di kuna datù diyà sa medoo tegeIslaél, owoy inalukan di ma kuna kedu diyà sa egkegaga i Saulo. ⁸Owoy igbegay di ma diyà keniko sa kedatuan i Saulo lapeg sa medoo sawa di. Kuna ma sa pinedatù i Nemula diyà sa langun tanà Islaél owoy tanà Huda. Amuk kulang pa iya wé diyà keniko, dugangen di pa uman sa ibegay di diyà keniko. ⁹Huenan di, maen di ya endà sinagipà ko duu sa kagi i Datù Nemula danà ko migbael sa tigtu medaet diyà sa kehaa di? Igpeimatay ko polo Uliyas i owoy sinawa ko ma sa sawa di. Tuu doo, igpeimatay ko Uliyas

i tegeHétiyo diyà sa medoo tegeAmon anì mekuwa ko sa sawa di. ¹⁰Na, danà ko migtipay diyà si Nemula egoh ko migkuwa sa sawa i Uliyas tegeHétiyo anì sawaen ko, huenan di dumuen sa duma tugod ko tigbasen sundang mesetugdugtugdug taman melugay. ¹¹Peduenen i Nemula kedu diyà sa malayan ko sa kumuntelà diyà keniko. Hauwen ko sa egoh i Nemula kumuwa sa medoo sawa ko owoy ibegay di diyà sa duma ko nesesebaen dalesan owoy meseuma da lawa, apiya di pa agdaw. ¹²Iglidung ko sa salà binaelan ko, dodoo ipebael i Nemula ini i diyà agdaw anì mehaa sa langun tegeIslaél.”

¹³Agulé mig-ikagi Dabid i diyà si Natan, guwaen di, “Tuu, nesalà a diyà si Datù Nemula.”

Migsagbì Natan i, guwaen di, “Na, danà ko nesenule, huenan di igpeuloy i Datù Nemula dé sa salà ko, owoy endà ma mematay ka. ¹⁴Dodoo danà iya wé salà binaelan ko, sinumbung ko Datù Nemula i. Huenan di, mematay iya wé anak yu.” ¹⁵Agulé miglikù Natan i.

Ini Sa Egoh Sa Anak I Dabid Nematay

Na, igpetuu i Datù Nemula sa inikagi di. Huenan di, tigtu miglinadu iya wé anak i Dabid diyà sa tapay sawa i Uliyas. ¹⁶Agulé migsimbà Dabid i diyà si Nemula anì melikuan sa anak da eglinadu. Mig-eked ma egkaen owoy migpetapus diyà sa bilik di, dodoo uman sigep tanà polo sa

kenà di eghibat taman umenaw simag. ¹⁷Agulé mig-angay sa medoo salu di diyà kenagdi anì petigdegen da, dodoo mig-eked owoy endà ma egpeunut di egkaen diyà kenagda.

¹⁸Na, egoh di neuma sa kepitu di agdaw, nematay sa batà. Dodoo egpesu sa medoo salu i Dabid egtulon diyà kenagdi denu sa batà nematay, enù ka guwaen da, “Amuk endà sinagipà di duu sa inikagi ta egoh sa batà nehagtay pelawà, labi pa egsagipà ini egoh di enù ka nematay dé sa batà. Petow ki daa mael polo medaet.”

¹⁹Na, egoh i Dabid eghaa sa medoo salu di egsebadàbadaay, iya sa penemdem di nematay dé sa batà. Huenan di, inigsà di, guwaen di, “Enù di ya, nematay dé sa batà?”

Migsagbì da, guwaen da, “Hoò, nematay dé.”

²⁰Agulé mig-enaw Dabid i owoy mig-angay egpedigus owoy linulowon di lana sa lawa di owoy sinambian di ma sa ginis di. Agulé mig-angay egsimbà diyà sa atung kenà da egsimbà diyà si Datù Nemula. Egoh di neubus egsimbà, miglikù diatas anì pemengana. Hê, pinekaen da.

²¹Agulé mig-igsà sa medoo salu di, guwaen da, “Maen di ya hediya sa binaelan ko? Egoh sa batà nehagtay pelawà, mig-eked ka egkaen owoy sininegawan ko ma. Dodoo egoh di nematay dé, mig-enaw ka owoy migkaen ka polo.”

²²Migsagbì Dabid i, guwaen di, “Egoh sa batà eglinadu pelawà, mig-eked a egkaen owoy sininegawan ku ma, enù ka iya sa penemdem ku mehiduwan i Datù Nemula aken owoy anì melikuan iya wé anak ku. ²³Dodoo ini egoh di nematay dé. Maen di ya umeked a pelawà kumaen? Megaga ku pa atu ipelikù sa ginawa di? Netiigan ku sebaen agdaw mekeangay a ma diyà sa kenà di, dodoo kagdi endà dé mekepelikù di diyà kenak, sumalà dé sa egkebaelan ku.”

²⁴Agulé pinepion i Dabid sa pedu sa sawa di si Batséba. Agulé egkesehulid da dema, owoy migkelalingen dema. Hê, mig-anak maama owoy pinengadanan da Solomon. Na, eghiduwan i Datù Nemula iya wé batà.

²⁵Agulé migpeuwit Nemula i kagi pineukit diyà si Natan tegesugkow kagi di anì pengadanan da Hédidaya,^k sa batà enù ka eghiduwan i Nemula kagdi.

Ini Sa Egoh I Dabid Migpeka Sa Menuwa Laba

(1 Kelonikas 20:1-3)

²⁶Na egoh iya, pinengayaw i Hoab sa menuwa Laba, sa pusung menuwa sa medoo tegeAmon, owoy nepeka di. ²⁷Migpeuwit Hoab i sa medoo etaw anì sumugkow diyà si Dabid owoy inikagiyan di, guwaen di, “Dinagseg ku sa

^k12:25 Sa selepangan sa ngadan Hédidaya, egkehiduwan i Nemula.

menuwa Laba owoy netigdegan ku sa keduwan wayeg di.

²⁸Huenan di, setipon ko sa medoo duma sundalu owoy ubus ko sa kepeka sa menuwa anì kuna sa meolò, beken aken. Dodoo amuk endà baelan ko duu iya wé, aken sa meka owoy pengadanan ku ini i sa ngadan ku.”

²⁹Huenan di, sinetipon i Dabid sa langun duma sundalu. Hê, mig-angay da dutu Laba dò owoy pinengayaw da sa menuwa owoy nepeka da. ³⁰Na, kinuwa i Dabid sa sapiyu bulawan kedu diyà sa ulu sa datù da owoy igsukub di diyà sa hagdi ulu. Duen medoo mapulù batu di owoy telu pulù owoy lima kakilu sa kebegat di. Medoo temù sa nepeka i Dabid langun taman diyà iya wé menuwa. ³¹Agulé inuwit di ma sa medoo etaw kedu iya wé menuwa, owoy binaluy di kagda tegeget kayu, owoy tegesadul, owoy tegetelisì owoy pinegalebek di ma kagda diyà sa kenà atung egpetegas tanà pinilpil. Ini sa binaelan di diyà sa langun menuwa sa tegeAmon. Agulé miglikù HéIusalém dò Dabid i lapeg sa langun duma di.

Ini Sa Denu Si Amnon Owoy Tamal

13 ¹Na, egoh di melugaylugay, egkeiyapan i Amnon anak i Dabid Tamal i, sa metolol tebay i Absalom anak i Dabid ma. ²Nebaluy miglinadu Amnon i danà di tigtu neiyap diyà sa kenogon tebay di si Tamal, enù ka endà egkebaelan

di duu sa ungayà di baelan diyà kenagdi.

³Na, duen sa loyok i Amnon si Honadab anak i Simiya kakay i Dabid, tigtu metiig egpeukit.

⁴Agulé sebaen agdaw, mig-igsà Honadab i diyà si Amnon, guwaen di, “Anak ka sa datù, dodoo maen di ya uman agdaw eghauwen ku kuna egkebukul? Tuloni ko aken sa tigtu egkebukulan kol!”

Hê, migsagbì Amnon i diyà kenagdi, guwaen di, “Egkeiyapan ku Tamal i sa tebay i Absalom sa hadi ku denu emà.”

⁵Agulé mig-ikagi Honadab i, guwaen di, “Hibat ka owoy ubdòbò ka linadu. Hê, amuk umangay sa emà ko anì hauwen di kuna, ikagiyi ko, guwaen ko, ‘Ungayà ku pa mangay sa hadi ku si Tamal anì begayan di aken sa sumalà dé mekaen. Ungayà ku kagdi sa egtapay mekaen diyà sa dapag ku anì hahauwen ku kagdi owoy anì sungiten di aken.’”

⁶Huenan di, mighibat Amnon i owoy ubdòbò miglinadu. Na, egoh i Datù Dabid migtelow kenagdi, mig-ikagi Amnon i, guwaen di, “Ungayà ku pa mangay dini sa hadi ku si Tamal anì mael sa tigtu mepion epan diyà sa dapag ku owoy anì sungiten di aken.”

⁷Hê, migpeuwit kagi Dabid i diyà si Tamal diyà sa dinelindingan, guwaen di, “Angay ka diyà sa dalesan sa kakay ko maama si Amnon owoy ilegal ko kagdi sa sumalà dé mekaen.” ⁸Huenan di, mig-angay Tamal i diyà sa dalesan sa kakay

di si Amnon, owoy hinaa di eghibat. Hê, migkuwa tapung Tamal i owoy linunang di owoy migbael epan diyà sa dapag i Amnon owoy inilegà di. ⁹Na, egoh di melegà dé, kinuwa di sa epan anì ipekaen di diyà si Amnon, dodoo mig-eked egkaen. Guwaen di polo, “Pelegkà ko dini sa langun etaw!” Huenan di, miglegkà da langun. ¹⁰Agulé mig-ikagi Amnon i diyà si Tamal, guwaen di, “Uwit ko dini diyà sa bilik ku sa kaenen anì sungiten ko aken.” Agulé kinuwa i Tamal sa kaenen tinapay di owoy inuwit di diyà sa bilik sa kakay di si Amon. ¹¹Dodoo egoh di telibubu egsungitan kenagdi, petow dé sinabaan di kagdi owoy guwaen di, “Téél ka dé, tebay ku, sehuliday ki.”

¹²Dodoo mig-ikagi Tamal i diyà kenagdi, guwaen di, “Yaka! Egpehiduhidu a yaka egtegel kenak! Yaka egbaelan duu diyà kenak ini i tigtu medaet. Endà mepion di amuk baelan ini i diyà tanà Islaél. ¹³Penemdem ko aken! Memalaan a taman melugay! Owoy penemdem ko ma kuna! Pengadanan ka sa medoo tegeIslaél tigtu ngahàngahà owoy endà duen lantek. Pegeni ko polo diyà sa datù, petow ki daa’t ipesawa di aken diyà keniko.”

¹⁴Dodoo endà migdinegdineg Amnon i diyà kenagdi, owoy danà di uman pa sa hagdi kebagel diyà si Tamal, nebaelan di sa ungayà di. ¹⁵Agulé tigtu egkelepuhan i Amnon Tamal i, owoy uman pa sa kekelepuh di

diyà sa kekeiyap di kenagdi egoh anay. Mig-ikagi Amnon i diyà kenagdi, guwaen di, “Enaw ka owoy laun ka dé!”

¹⁶Dodoo migsagbì Tamal i, guwaen di, “Yaka! Enù ka sa kepelegkà ko kenak uman pa dakel salà diyà sa binaelan ko diyà kenak.”

Dodoo endà migdinegdineg Amnon i diyà kenagdi. ¹⁷Inumow di polo sa munoy egsugùsuguen di, owoy guwaen di, “Pelaun ko siini bayi owoy pintui ko sa selat.” ¹⁸Huenan di pinelaun sa egsugùsuguen di Tamal i owoy pinintuan di sa selat. Egoh iya migkawal Tamal i sa metolol melomboy kawal, enù ka iya sa egkawalen sa medoo kenogon anak sa datù. ¹⁹Agulé, migtenà Tamal i medoo abuh diyà sa ulu di owoy kinisi di ma sa metolol melomboy kawal di. Linimunan di belad di sa palas di owoy eghuyhuy ligò di eg-ipanaw.

²⁰Na, egoh sa kakay di si Absalom mighaa kenagdi, inigsaan di, guwaen di, “Pinedaetan i Amnon kuna? Egpehiduhidu a diyà keniko, tebay, yaka dé temù egkebukulan sa nebaelan ko, enù ka kakay ko kagdi denu emà.” Na, mig-ugpà Tamal i diyà sa dalesan i Absalom ligò di egkebukul owoy egpeiges-iges.

²¹Na, egoh i Datù Dabid neketiig sa nebaelan, tigtu temù migbulit. ²²Endà duen sebaen kagi inikagi i Absalom diyà si Amnon iling ka mepion ataw ka medaet, dodoo tigtu egkelangetan di Amnon i enù ka pinemala di sa tebay di si Tamal.

Ini Sa EgoH I Amnon Inimatayan I Absalom

²³Na, egoH di migtalà sa duwa gepalay, egguntingan sa medoo egsugùsuguen i Absalom sa medoo kebilibili di diyà menuwa Baal Hasol medapag diyà sa elet sa tanà Ipelaim. Inagup di sa langun maama anak sa datù anì lumenged da. ²⁴Agulé mig-angay Absalom i diyà si Datù Dabid owoy mig-ikagi, guwaen di, “Egguntingan sa medoo egsugùsuguen ku sa medoo kebilibili ku. Umangay ka pa lapeg sa medoo pineulu-ulu ko diyà siini lenggà?”

²⁵Agulé migsagbi sa datù, guwaen di, “Yaka dé, anak, enù ka mebegatan ka daa amuk umangay ké langun.” Na, apiya di pa tigtu inungayà i Absalom, tapay doo mig-eked eg-ipanaw, huenan di igbegay di daa kenagdi sa bagi di.

²⁶Hê, mig-ikagi Absalom i, guwaen di, “Amuk meked ka, si Amnon telehadi ku daa polo sa peangay ko.” Hê mig-igsà sa datù, guwaen di, “Maen di ya tigtu kailangan pa kagdi munut keniko?” ²⁷Dodoo tigtu egtegel Absalom i, huenan di pineunut i Dabid dé Amnon i lapeg sa medoo liyu anak di maama.

²⁸Agulé migsugù Absalom i diyà sa medoo egsugùsuguen di, guwaen di, “Dineg yu! Amuk hiluwen dé Amnon i danà sa keinem di wain, owoy amuk mikagi a diyà keniyu, imatayi yu. Yoko egkelimedangan na, enù ka aken sa egsugù keniyu.

Dodoo pebagel yu owoy pebalaw yu.” ²⁹Agulé pinangunutan sa medoo egsugùsuguen i Absalom sa igsugù di owoy inimatayan da Amnon i. Hê, migkudà da asnu sa medoo duma maama anak i Dabid owoy migpelaguy da.

³⁰Na, ligò da diyà dalan pelawà eglìkù dutu Hêlusalém dò, duen sa etaw migtulon diyà si Dabid, guwaen di, “Inimatayan i Absalom sa langun maama anak ko! Endà duen sa nesamà diyà kenagda.” ³¹Agulé migtigdeg Dabid i, kinisì di sa kawal di owoy mighibat diyà sa tanà. Hediya ma, kinisì ma sa langun egsugùsuguen di sa hagda kawal ligò da migtigdeg daa dahiya.

³²Dodoo mig-ikagi Honadab i anak i Simiya kakay i Dabid, guwaen di, “O Datù Meadatan, yaka egpenemdem duu inimatayan da langun sa medoo maama anak ko. Si Amnon daa sa nematay. Nelugay dé inungayà i Absalom imatayan Amnon i edung sa agdaw egoH di miglegen sa tebay di si Tamal. ³³Huenan di, yaka egpigtuu ya sa tulon denu sa langun maama anak ko sa nematay. Dodoo si Amnon daa sa nematay. ³⁴Owoy migpelaguy dé Absalom i.”

Na, duen sa tegebantay nekehaa sa medoo etaw denu eleden agdaw. Egkegodgod da diyà sa kalasada diyà sa getan. Agulé mig-angay sa tegebantay egtulon diyà sa datù, guwaen di, “Duen sa hinaa ku medoo etaw eg-ukit diyà sa kalasada sa diyà lagpian egtodò menuwa Holonaim dò.”

³⁵ Agulé mig-ikagi Honadab i diyà sa datù, guwaen di, “Haa ko, Meadatan datù! Kaiya dé sa medoo anak ko maama lagà sa inikagi ku giina.”

³⁶ Hê, egoh di neubus eg-ikagi, mig-awoh sa medoo maama anak i Dabid owoy egsinegaw da metaled. Egsinegaw ma metaled sa datù lapeg sa langun egsugùsuguen di.

³⁷⁻³⁸ Na, migpelaguy Absalom i owoy mig-angay diyà si Talmay anak i Amihud, datù diyà menuwa Gésol, owoy mig-ugpà dutu taman telu gepalay. Dodoo uman agdaw, nebukulan i Datù Dabid sa anak di si Amnon. ³⁹ Hê, egoh di netupawan dé Dabid i sa kekebukul di sa kepatay i Amnon, tigtu egkebugaan di dé sa anak di si Absalom.

Ini Sa Egoh I Absalom Egpelikù Diyà Héulusalém

14 ¹ Na, netiigan i Hoab anak i Seluwaya egkebugaan i Datù Dabid Absalom i. ² Huenan di, migsugù Hoab i etaw anì mangay Tékowa dò anì kumuwa sa sebaen bayi panday umikagi. Hê, egoh sa bayi migtebow, inikagiyan i Hoab, guwaen di, “Ubòubò ka temù nebukul owoy luhubi ko sa ginis egkebukul. Yaka egpetolol la, dodoo ubòubò ka polo nebukul sa pila dé agdaw etaw nematay. ³ Agulé ipanaw ka angay diyà sa datù owoy ikagi ko diyà kenagdi sa ikagiyan ku diyà keniko.” Hê, tinolon i Hoab diyà sa bayi sa ikagiyan di diyà sa datù.

⁴ Na, egoh sa bayi tegeTékowa migtebow diyà sa datù,

migligkued owoy igduemel di sa kilay di diyà tanà danà keadat di owoy mig-ikagi, guwaen di, “O Datù Meadatan, tabangi ko aken!”

⁵ Mig-igsà sa datù diyà kenagdi, guwaen di, “Ngadan sa egkebukulan ko?”

Hê, migsagbì sa bayi, guwaen di, “Balu a enù ka nematay dé sa sawa ku. ⁶ Duen sa duwa anak ku maama owoy sebaen agdaw neseginalu da dutu galebekan dò. Hê, danà di endà duen sa migsegela kenagda, binalbal di sa sebaen, agulé nematay. ⁷ Na, mig-angay diyà kenak sa langun duma telehadi sa sawa ku owoy eg-ikagi da, guwaen da, ‘Begayi ko diyà kenami sa anak ko, anì imatayan ké danà di mig-imatay sa telehadi di. Endà enget di sumakem sa lalawan sa emà di.’ Na, amuk baelan da ini i, mekedan sa nesamà anak ku sa egpaginawaen ku mekebulig kenak, owoy mekedan ma dé sa ngadan sa sawa ku ataw ka sa tugod di diyà siini uwang tanà.”

⁸ Hê, mig-ikagi sa datù diyà sa bayi, guwaen di, “Likù ka dé dutu kenà yu dò. Aken dé sa metiig owoy megay a sugù anì endà pedaetan da duu sa anak ko.”

⁹ Agulé mig-ikagi sa bayi tegeTékowa diyà sa datù, guwaen di, “Ulu-ulu ku owoy O Datù Meadatan ku, mebaluy aken lapeg sa malayan ku sa sumagbì sa selsel owoy endà duen sa niko salà lapeg sa kedatuan ko.”

¹⁰ Migsagbì sa datù, guwaen di, “Amuk duen pa sa umikagi diyà

keniko, uwit ko diyà kenak anì endà dé bogowen di duu kuna uman.”

¹¹Agulé mig-ikagi dema sa bayi, guwaen di, “O Datù Meadatan, pasad ka, hih, diyà si Datù Nemula, sa Nemula ko, anì endà humoò ka amuk duen sa sumuli sa anak ku anì endà mematay di. Amuk hediya, endà dé dumuen sa medaet mebaelan.”

Migsagbì Datù Dabid i, guwaen di, “Ipasad ku diyà si Datù Nemula, sa Nemula nehagtay, endà duen sebalu balut ulu sa anak ko metaktak diyà tanà.”

¹²Agulé mig-ikagi dema sa bayi, guwaen di, “O Datù Meadatan, sebaen pa sa egpegeniyen ku diyà keniko.” Migsagbì sa datù, guwaen di, “Na, ikagi ka.”

¹³Mig-ikagi sa bayi, guwaen di, “Beken atu salà ko diyà sa etaw i Nemula sa keipat ko sa naken anak, dodoo hinemagawan ko polo sa niko anak owoy endà dé pelikuen ko duu? ¹⁴Mematay sa langun etaw, owoy lagà da daa sa wayeg binuwah diyà tanà endà dé metipon di duli. Dodoo endà medelamet di kuwaen i Nemula sa hagtay etaw, dodoo eglagbet polo kepeukit anì mekepelikù sa medoo etaw nekepediyù diyà kenagdi.

¹⁵“O Datù Meadatan, mig-angay a dini anì tumulon a diyà keniko sa kelikutan ku, enù ka egkelimedangan a sa tolol baelan sa medoo duma ku. Egpenemdem a sumetawit diyà keniko, enù ka petow ki

daa ibegay ko diyà kenak sa egpegeniyen ku. ¹⁶Petow ki daa duminegdineg ka diyà kenak owoy ipeiwod ko aken diyà sa etaw egkelukuy mimatay kenak lapeg sa anak ku anì mekedan sa tanà igbegay i Nemula diyà kenami.

¹⁷“Na, o Datù, metanà dé sa pedu ku danà sa niko kepeukit, enù ka kuna lagà sa egsugùsuguen i Nemula neketiig sa mepion owoy sa medaet. Ungayà ku unut-unutan i Datù Nemula kuna sa Nemula ko!”

¹⁸Agulé mig-ikagi sa datù diyà sa bayi, guwaen di, “Na, tuloni ko aken sa tuu denu sa igsaen ku diyà keniko.” Agulé migsagbì sa bayi, guwaen di, “Na mebaluy, O Datù Meadatan.”

¹⁹Mig-igsà sa datù, guwaen di, “Si Hoab pa sa migtulù keniko denu ini i?”

Migsagbì sa bayi, guwaen di, “O Datù Meadatan, endà mekepalaw a sa igàsà ko diyà kenak. Hoò, si Hoab sa egsugùsuguen ko sa egsugù kenak owoy sa egtulù sa medoo ikagiyen ku. ²⁰Binaelan di ini i anì kumepion sa kesedumaway yu si Absalom, dodoo netiigan ko ini i, O Datù Meadatan, enù ka lagà ka sa egsugùsuguen i Nemula neketiig sa langun egkebaelan diyà sa nita inged!”

²¹Huenan di, igasàsà sa datù Hoab i owoy inikagiyan di, guwaen di, “Na, meiyap a doo sa egpegeniyen ko. Na, ipanaw ka dé owoy pepelikù ko dini Absalom i.”

²²Agulé miglagkeb Hoab i owoy igtenà di sa kilay di diyà

tanà anì tandaan di sa keadat di, owoy guwaen di, “Ungayà ku bagian i Nemula kuna, O Datù Meadatan. Ini egoh netiigan ku dé netuuwan ka diyà kenak enù ka igpetuu ko sa pinegeni ku!”

²³Agulé mig-ipanaw Hoab i dutu menuwa Gésol dò. Hê, egoh di migpelikù diyà Hêlusalém, inuwit di Absalom i. ²⁴Dodoo migsugù sa datù, guwaen di, “Peangay yu kagdi diyà sa hagdi munoy dalesan, enù ka endà meiyap a humaa kenagdi.” Huenan di, miglikù Absalom i diyà sa dalesan di owoy endà migpehaa di diyà sa datù.

Ini Sa Egoh I Dabid Owoy Absalom Nesepelikù Pedu

²⁵Na, diyà sa uwang tanà Israél, endà duen sa neketepeng sa ketemù maama i Absalom. Huenan di, egkeolò sa langun etaw kagdi i enù ka endà duen sa mesigbolow kenagdi kedu diyà sa pulu di taman diyà sa takem lisen di. ²⁶Segulê daa egpegunting uman palay owoy egpegunting enù ka egkebegatan sa balut ulu di. Amuk timbangan sa balut ulu di, egpekeuma duwa kakilu owoy tengà sa begat di. ²⁷Na, duen sa telu maama anak i Absalom owoy sebaen bayi. Iya sa ngadan sa bayi si Tamal, owoy tigtu metolol.

²⁸Na, taman duwa gepalay sa lugay i Absalom eg-ugpà diyà Hêlusalém owoy endà migpehaa di diyà sa datù. ²⁹Agulé sebaen agdaw, igsasà i Absalom Hoab i anì peangayen di peolom diyà si Datù Dabid denu kenagdi. Dodoo

endà mig-angay Hoab i diyà si Absalom. Huenan di, igsasà di diyà sa keduwa di gulê, dodoo tapay doo endà mig-angay di. ³⁰Agulé mig-ikagi Absalom i diyà sa medoo egsugùsuguen di, guwaen di, “Ulow yu sa hinemulaan sébada i Hoab, sa nekeabay diyà sa naken galebekan.” Hê, inulow da sa hinemulaan i Hoab.

³¹Agulé mig-angay Hoab i diyà sa dalesan i Absalom, owoy mig-ikagi diyà kenagdi, guwaen di, “Maen di ya inulow sa medoo egsugùsuguen ko sa hinemulaan ku?”

³²Migsagbì Absalom i, guwaen di, “Enù ka endà mig-angay ka dini egoh ku migsasà keniko. Ungayà ku mangay ka hedem diyà sa datù anì igsasen ko sa pesuwan di igpeangay di pa aken kedu diyà menuwa Gésol. Mepion pa hedem amuk eg-ugpà a daa dutu. Na, ini egoh di ungayà ku mehaa sa datù. Amuk nekesalà a, mebaluy imatayan di dé aken.”

³³Agulé mig-angay Hoab i diyà sa datù owoy tinulon di sa inikagi i Absalom. Hê, igpesasà sa datù Absalom i. Agulé egoh di migtebow, migligkued owoy igduemel di sa kilay di diyà tanà danà sa keadat di sa datù. Agulé iningadekan sa datù Absalom i.

Ini Sa Egoh I Absalom Eppenemdem Kumuntelà Si Dabid

15 ¹Na, egoh di neubus iya wé, nekesakem Absalom i sebaen kalitun eggila owoy medoo kudà owoy lima pulù

etaw mantay kenagdi. ²Na, uman agdaw eglapug eg-enaw Absalom i owoy egtigdeg diyà sa kilidan kalasada eg-angay diyà sa bengawan sa menuwa. Amuk duen etaw épê kelikutan egtebow owoy ungayà di ipeantang diyà sa datù, eg-igsaan i Absalom ngadan sa keduwan di. Hê, egtulonon di sa susun sa tugod di diyà tanà Islaél. ³Agulé eg-ikagi Absalom i diyà kenagdi, guwaen di, “Tumaban hedem sa lidù ko, dodoo endà duen sa sinaligan sa datù anì umantang iya wé. ⁴Na, amuk aken daa hedem sa tegekukum, mekedapag diyà kenak sa uman sebaen etaw egsagdig épê lidù owoy mekebegay ku doo diyà kenagdi sa nesugat keantang.”

⁵Owoy amuk pedapag sa etaw diyà si Absalom owoy lumigkued anì umadat, eglapen di owoy ingadekan di danà sa kesalibatun di. ⁶Na, hediya sa binaelan i Absalom diyà sa langun tegeIslaél eg-angay diyà sa datù anì ipeantang da sa lidù da. Huenan di, nealiyug di sa pedu sa medoo tegeIslaél.

⁷Na, egoh di migtalà sa epat gepalay, mig-ikagi Absalom i diyà sa datù, guwaen di, “Peipanaw ko aken mangay Hibelon dò anì ipetuu ku sa igpasad ku diyà si Datù Nemula. ⁸Ligò ku pelawà eg-ugpà dutu Gésol dò diyà tanà Alam, migpasad a diyà si Nemula anì sumimbà a dutu Hibelon dò amuk pelikuen i Nemula pa aken diyà Hélusalém.”

⁹Agulé mig-ikagi sa datù diyà kenagdi, guwaen di, “Na, metanà

sa keipanaw ko.” Hê mig-angay Absalom i dutu Hibelon dò.

¹⁰Dodoo egoh i Absalom dutu Hibelon dò, migpeangay sa medoo nelidung tegesugkow diyà sa nesakupan sa tanà Islaél anì umikagi da, guwaen da, “Amuk dinegen yu sa tegbuli, ikagi yu petaled, guwaen yu, ‘Si Absalom dé sa datù diyà Islaél owoy egpedatù dutu Hibelon dò!’ ” ¹¹Na, igsasà i Absalom sa duwa gatus geetaw tegeHélusalém anì munut da kenagdi. Kagda sa medoo melengen inagup owoy mig-unut da apiya di pa endà neketiig da sa penemdem i Absalom. ¹²Na, ligò i Absalom egbegay hinagtay anì eg-ulowen, igsasà di ma Ahitopél i tegeGilo sa sebaen tegedadan i Dabid. Agulé egoh di nelugaylugay, migkedoo pa uman sa etaw migtampil diyà si Absalom, huenan di egkegamel pa uman sa penemdem di umatu diyà si Dabid.

Ini Sa Egoh I Dabid Migpelaguy

¹³Na, duen sa sebaen tegesugkow mig-angay diyà si Dabid owoy tinulonon di, guwaen di, “Nealiyug i Absalom dé sa pedu sa medoo tegeIslaél.”

¹⁴Huenan di, mig-ikagi Dabid i diyà sa langun pineulu-ulu di sa дума di dutu Hélusalém dò, guwaen di, “Téél yu dé, melaguy ki. Petow ta daa endà duen sa mekelesò diyà si Absalom. Mapes ki lumegkà enù ka petow ta daa meumawan di kita owoy imeten di kita mimatay lapeg sa medoo etaw tegeHélusalém.”

¹⁵Mig-ikagi sa langun pineulu-ulu di, guwaen da, “O Datù Meadatan, neketapay ké dé mael sumalà dé sa isugù ko.”

¹⁶Agulé miglegkà Dabid i owoy mig-unut diyà kenagdi sa langun malayan di, dodoo tinangtang di daa sa sepulù lagdà sawa di anì unipat da sa dinelingdingan. ¹⁷Hê, egoh i Dabid miglegkà dé lapeg sa medoo etaw mig-unut kenagdi, mig-etud da diyà sa sabuhanan dalesan diyà menuwa Hêlusalém.

¹⁸Na, pinehuna i Dabid sa medoo sundalu di lapeg sa medoo tegebantay di, agulé migsetugdug sa enem gatus tegeGita sa mig-unut kenagdi kedu diyà menuwa Gat.

¹⁹Agulé, mig-ikagi sa datù diyà si Itay sa kaunutan sa medoo tegeGita, guwaen di, “Maen di ya egkelukuy yu munut kenami? Pelikù yu Hêlusalém dò, owoy unut yu diyà sa magtu datù si Absalom, enù ka beken etaw yu dini enù ka sinalidan yu sa niyu tanà. ²⁰Endà pelawà nelugay yu migtebow dini, dodoo ini egoh duen pedu yu munut kenami. Apiya kami, endà netiigan ké duu amuk ngadan sa angayan ké. Huenan di, likù ka dé lapeg sa langun etaw ko. Ungayà ku ipehaa i Nemula sa endà mehalì kehidu di owoy ketabang di keniyu.”

²¹Dodoo migsagbì Itay i diyà sa datù, guwaen di, “Ipengibet ku diyà sa nehagtay Nemula owoy diyà keniko, O Datù Meadatan, sumalà dé sa angayan ko, umunut ké keniko, apiya

kepatay sa mehauwan ataw ka kepionon.”

²²Mig-ikagi Dabid i diyà kenagdi, guwaen di, “Amuk hediya, unut yu kenak.” Huenan di, mig-ipanaw Itay i owoy sa langun etaw di, lapeg sa medoo malayan da.

²³Na, egsinegaw metaled sa medoo etaw tegeHêlusalém egoh sa medoo etaw i Dabid egtalà. Agulé migbatas da sa lepak Kidelon, owoy egtekedeg da eg-angay diyà sa begangbegang.

²⁴Dutu ma sa tegesimbà si Sadok owoy Abiyatal, lapeg sa medoo tugod i Lebi sa migseoyong sa Baul Tandà Pasad i Nemula. Hê, igtenà da sa Baul Tandà Pasad i Nemula diyà sa kilidan dalan, agulé mig-ulow hinagtay Abiyatal i daya, taman sa egoh di nekelegkà sa langun etaw i Dabid kedu diyà Hêlusalém.

²⁵Agulé mig-ikagi Dabid i diyà si Sadok, guwaen di, “Uwit ko pelikù sa Baul Tandà Pasad i Nemula dutu Hêlusalém dò. Amuk metuuwan Datù Nemula i diyà kenak, pelikuen di doo aken diyà Hêlusalém owoy mehaa ku dema ini i owoy sa Tolda kenà di pineugpà.” ²⁶Dodoo amuk endà dé metuuwan di diyà kenak, neketapay a dé sumalà dé sa ungayà di baelan diyà kenak.”

²⁷Agulé mig-uman eg-ikagi sa datù diyà sa tegesimbà si Sadok, guwaen di, “Na, pelikù yu metanà si Abiyatal dutu Hêlusalém dò lapeg si Ahimaas anak ko owoy si Honatan anak i Abiyatal, owoy tulitkulik

yu dutu. ²⁸Umangat-angat a diyà sa keladayan wayeg dutu siedò begangbegang taman mekesakem a sa tulon kedu diyà keniyu.” ²⁹Huenan di, igpelikù i Sadok owoy Abiyatal sa Baul Tandà Pasad i Nemula dutu Hélusalém dò, owoy mig-ugpà da dutu.

³⁰Dodoo migtekedeg Dabid i diyà sa tuduk Olibu. Kinedanan di sa talumpà di owoy migdudum ligò di egsinegaw. Hê, langun sa etaw mig-unut kenagdi, linimunan da sa ulu da owoy egsinegaw da ma ligò da egtekedeg. ³¹Na, duen sa migtulon diyà si Dabid, guwaen di, “Egtampil ma dé Ahitopél i diyà si Absalom.” Hê, migsimbà Dabid i, guwaen di, “O Datù Nemula, pelegkù ko sa kagi i Ahitopél.”

³²Na, egoh i Dabid nekeuma diyà sa pulu’t tuduk Olibu kenà sa medoo etaw anay egsimbà diyà si Nemula, migtelabuk Husay i tegeAlkiya kenagdi dutu. Nekisì sa kawal di owoy duen sa kepung diyà sa ulu di tandà sa kekebukul di. ³³Agulé mig-ikagi Dabid i diyà kenagdi, guwaen di, “Amuk pelagbas ka munut kenak, mekepebegat ka daa. ³⁴Dodoo mepion amuk pelikù ka dutu Hélusalém dò owoy tulonon ko Absalom i, guwaen ko, ‘Na, gumalebek a diyà keniko, o Datù, lagà medaa sa egoh ku anay miggalebek diyà sa emà ko.’ Hê, mebuligan ko pa aken danà sa kealang ko sa dadan i Ahitopél. ³⁵Dutu ma sa tegesimbà si Sadok owoy Abiyatal. Tuloni ko kagda

sa langun egdinegen ko diyà sa dinelingdingan. ³⁶Agulé peangay ko dini diyà kenak sa anak da si Ahimaas owoy si Honatan anì tulonon da aken denu sa dinineg ko.”

³⁷Huenan di, migpelikù Husay i loyok i Dabid dutu Hélusalém dò, owoy iya ma sa ketebow i Absalom diyà Hélusalém.

Ini Denu Si Dabid Owoy Siba

16 ¹Na, egoh i Dabid migtalà tukéey diyà sa pulu tuduk, dutu dé Siba i sa egsugùsuguen i Mépibosét eg-angat kenagdi. Duen medoo asnu linulanan di duwa gatus getibulu epan, magatus geekup bunga’t palas owoy magatus geekup bunga’t kayu pigus owoy sebaen kunul hinagtay inawohan wain.

²Hê, inigsaan sa datù Siba i, guwaen di, “Maen di ya mig-uwit ka ini i?”

Migsagbì Siba i, guwaen di, “Sa medoo asnu pekudaan sa malayan sa datù, owoy sa epan owoy sa medoo bunga sa mekaen sa medoo etaw ko, owoy sa wain inemen sa medoo etaw ko meliteg dutu siedò begangbegang.”

³Agulé mig-igsà Dabid, guwaen di, “Kenà i Mépibosét ya duu sa bébê i Saulo datù ko?” Migsagbì Siba i, guwaen di, “Migpetangtang daa dutu Hélusalém dò, enù ka egpenemdemen di, ‘Igho ipelikù sa medoo tegeIslaél diyà kenak sa kedatuan sa bébê ku.’ ”

⁴Agulé mig-ikagi Dabid i diyà si Siba, guwaen di, “Amuk hediya,

ibegay ku diyà keniko ini egoh sa langun taman i Mépibosét.” Agulé mig-ikagi Siba i, guwaen di, “O Datù Meadatan, neketapay a gumalebek diyà keniko. Ungayà ku metuuan ka diyà kenak.”

Ini Sa Egoh I Simi Migtubad Si Dabid

⁵Na, egoh i Dabid egkedapag diyà menuwa Bahulim, duen sa etaw miglaun kedu diyà iya wé menuwa owoy tinubad di Dabid i. Iya sa ngadan di si Simi anak i Géla owoy duma telehadi i Saulo. ⁶Linegas di batu Dabid i lapeg sa medoo pineulu-ulu di, owoy sa medoo sundalu di owoy sa medoo tegebantay di apiya di pa sineulingutan da kagdi. ⁷Mig-ikagi Simi i, guwaen di, “Legkà ka, kuna i tegeimatay, enù ka medaet ka etaw. ⁸Igpesugat i Nemula diyà keniko sa kesulì di sa egoh ko mig-imatay sa medoo tugod i Saulo sa pinekawan ko sa kedatuan. Dodoo igbegay i Nemula polo sa kedatuan diyà si Absalom anak ko. Egtebow dé diyà keniko sa pigtamay enù ka tegeimatay ka.”

⁹Aglulé mig-ikagi Abisay i anak i Seluwaya diyà si Datù Dabid, guwaen di, “O Datù, maen di ya egpandayaen ko sa ketubad di? Pandayà ko aken epalen ku sa ulu di.”

¹⁰Dodoo mig-ikagi sa datù, guwaen di, “Kiyu i medoo anak i Seluwaya, endà duen sa niyu dahini. Amuk egtubaden di aken danà di sinugù i Nemula, ngadan sa mekesigbolow kenagdi?”

¹¹Aglulé inikagiyan i Dabid Abisay i owoy sa langun egsugùsuguen di, guwaen di, “Amuk egkelukuyan a sa anak ku mimatay, labi pa kéen endà kumelukuy siini tugod i Bénhamin, huenan di pandayà yu dé enù ka sinugù i Nemula. ¹²Petow ki daa hauwen i Datù Nemula sa kekebukul ku, owoy begayan di polo aken mepion danà sa ketubad da kenak siini agdaw.”

¹³Huenan di, migkelus Dabid i lapeg sa medoo etaw di eg-ipanaw ligò i Simi eg-ukit diyà sa getan egtodò diyà kenagda owoy tapay doo takà egtubad ligò di eg-ipanaw, owoy eglegasen di batu owoy tanà Dabid i. ¹⁴Aglulé tigtu neliteg Dabid i lapeg sa langun etaw eg-unut kenagdi egoh da nekeuma diyà sa lawa’t wayeg Holdan, huenan di mig-etud da dahiya.

Ini Sa Egoh I Husay Mig-angay Diyà Si Absalom

¹⁵Na egoh iya wé, mig-angay Hélushalém dò Absalom i lapeg si Ahitopél owoy sa medoo tegeIslaél. ¹⁶Aglulé mig-angay Husay i tegeAlkiya loyuk i Dabid diyà si Absalom, owoy mig-ikagi, guwaen di, “Kumelalù sa datù! Kumelalù sa datù!”

¹⁷Aglulé inigsaan i Absalom Husay i, guwaen di, “Ini luma sa keadat ko sa loyuk ko si Dabid? Maen di ya endà mig-unut ka kenagdi?”

¹⁸Migsagbì Husay i, guwaen di, “Kuna sa hinemilì i Nemula

owoy sa langun tegeIslaél anì kumedatù, huenan di umunut-unut a diyà keniko.

¹⁹Owoy ngadan atu sa pangunutan ku amuk beken sa anak i Dabid? Pinangunutan ku sa emà ko, huenan di pangunutan ku ma kuna.”

²⁰Agulé inikagiyan i Absalom Ahitopél i, guwaen di, “Dadani ko kami denu sa enget baelan ta.”

²¹Migsagbì Ahitopél i, guwaen di, “Inuma’t lawa ko sa medoo bayi lagdà sawa sa emà ko sa tinangtang di anì umipat sa dinelingdingan. Agulé dinegen sa langun tegeIslaél egoh di nebaluy ka kuntelà sa emà ko. Amuk hediya, kumebagel polo sa medoo etaw tumampil diyà keniko.” ²²Huenan di, binaelan da kemalig Absalom i diyà sa atep dinelingdingan, owoy ininuma’t lawa di sa medoo lagdà sawa sa emà di diyà sa kehaa sa langun tegeIslaél.

²³Na egoh iya, tigtu egpangunut Absalom i diyà sa dadan i Ahitopél, iling sa binaelan i Dabid emà di, enù ka pinelagà da kagi kedu si Nemula sa langun igdadan i Ahitopél.

17 ¹Agulé mig-ikagi Ahitopél i diyà si Absalom, guwaen di, “Pehemilì ko aken sepulù owoy duwa ngibu maama enù ka lohoten ku Dabid i igkani sigep. ²Gebeken ku kagdi kenokot egkeliteg owoy nekedan bagel. Limedangen ku kagdi, huenan di melaguy sa langun duma di. Agulé sa datù daa sa imatayan ku, ³enù ka kagdi daa sa meiyapan ko meimatayan.

Dodoo ipelikù ku diyà keniko sa langun etaw di, lagà sa bayi pelikù diyà sa sawa di. Amuk hediya, kumelanih dé sa keugpà sa langun etaw.” ⁴Na, netuuwan Absalom i owoy sa medoo kaunutan tegeIslaél diyà iya wé igdadan i Ahitopél.

Ini Sa Egoh I Husay Migpeulan Sa Dadan I Ahitopél

⁵Dodoo mig-ikagi Absalom i, guwaen di, “Peangayen ku dini Husay i tegeAlkiya anì dinegen ta ma sa hagdi ikagiyan.”

⁶Huenan di, egoh i Husay migtebow, mig-ikagi Absalom i diyà kenagdi, guwaen di, “Ini sa igdadan i Ahitopél. Pangunutan ta pa sa inikagi di ataw ka endà? Ngadan sa niko ma meikagi?”

⁷Agulé sinagbian i Husay Absalom i, guwaen di, “Endà milantek sa igdadan i Ahitopél ini egoh di. ⁸Netiigan ko doo tigtu nelayam sa emà ko diyà sa kesegilaway owoy hediya ma sa medoo etaw di. Egkelangget da lagà sa uled tanà oso pinekawan anak. Owoy beken iya daa, enù ka tigtu nelayam sa emà ko sa kesepatayay owoy endà umamut di tumudug diyà sa kedoowon sundalu di. ⁹Tani ko daa ini egoh di miglidung dé diyà sa sebaen takub ataw ka diyà sa liyu ma kenà. Amuk meuma sa kesegebekay da, duen sa medoo etaw ko mematay. Agulé sumalà dé sa mekedineg ini i, mikagi da, guwaen da, ‘Nedaetan sa medoo etaw i Absalom.’ ¹⁰Agulé apiya sa mebalaw sundalu lagà liyun, tebowen doo sa dakel

kekelimedang enù ka netiigan sa langun tegeIslaél sa egoh di nelayam sa emà ko diyà sa gila owoy pelpel ma sa medoo etaw di.

¹¹“Huenan di ini sa dadan ku, setipon ko sa langun sundalu tegeIslaél kedu diyà menuwa Dan denu gimataan taman diyà menuwa Bélsiba denu belabagan, anì mekeiling da enay mantadan. Owoy kuna sa mangulu kenagda mengayaw si Dabid. ¹²Amuk mehaa ta, mesigkem ta sumalà dé sa kenà di eglidung owoy gebeken ta lagà sa aglù egtegùtù diyà tanà. Endà duen sa mesamà diyà sa langun kedoo etaw di. ¹³Amuk pelahuk lumidung diyà sa sebaen kinutà menuwa, umuwit tali sa langun tegeIslaél anì poloten da sa kutà di owoy godoyen da mangay diyà sa sugud taman anì pa sebaen batu mesamà.”

¹⁴Agulé mig-ikagi Absalom i owoy sa langun pineulu-ulu di tegeIslaél, guwaen da, “Uman pa mepion sa igdadan i Husay diyà sa igdadan i Ahitopél.” Na, iya sa inikagi da enù ka ungayà i Nemula endà megulub sa dadan i Ahitopél anì mepigtamayan Absalom i.

Ini Sa Egoh I Dabid Migpelesò

¹⁵Agulé mig-angay Husay i diyà sa tegesimbà si Sadok owoy Abiyatal, owoy tinulon di diyà kenagda sa dadan i Ahitopél diyà si Absalom owoy sa medoo kaunutan tegeIslaél. Tinulon di ma diyà kenagda sa hagdì dadan diyà si Absalom.

¹⁶Agulé mig-ikagi diyà kenagda, guwaen di, “Téél yu dé. Pesugui yu Dabid i owoy ikagi yu anì endà tumudug di diyà sa begangbegang siini sigep, dodoo matas polo mangay tanà dutu lawa’t wayeg Holdan dò. Petow ki daa meimatayan sa datù lapeg sa langun дума di.”

¹⁷Na egoh iya, eg-angat-angat Honatan i owoy Ahimaas dutu tebulan Ènlugél dò, enù ka ungayà da endà duen sa mekehaa kenagda amuk lumudep da diyà Hélusalém. Huenan di, duen sa bayi egsugùsuguen sa umangay tumulon diyà kenagda denu sa medoo egkebaelan, agulé kagda dema sa tumulon diyà si Dabid. ¹⁸Dodoo duen sa sebaen batàbatà mighaa kenagda owoy tinulonon di Absalom i. Huenan di, migpedelamet miglegkà Honatan i owoy Ahimaas owoy mig-angay da diyà sa dalesan sa etaw dutu Bahulim dò. Duen sa paligi di medapag diyà sa dalesan di owoy miglidung da dalem. ¹⁹Sinagpeng sa sawa di sa ebà paligi owoy binelégés di sa medoo teligo dahiya anì endà duen sa meketiig.

²⁰Hê, egoh di migtebow sa medoo etaw i Absalom diyà sa dalesan sa bayi, inigsaan da, guwaen da, “Hinaa ko pa Ahimaas i owoy Honatan?”

Migsagbì sa bayi, guwaen di, “Migbatas da dé diyà sa lawa’t wayeg.” Agulé egoh da miglagbet, endà hinaa da duu Ahimaas i owoy Honatan, huenan di migpelikù da Hélusalém dò.

²¹Na, egoh da mig-ipanaw dé sa medoo tegelagbet, miglaun Honatan i owoy Ahimaas kedu dalem sa paligì. Agulé mig-angay da egtulon diyà si Datù Dabid denu sa penemdem i Ahitopél mimatay kenagdi, owoy guwaen da ma diyà kenagdi, “Petéél ka dé batas sa lawa’t wayeg siini sigep.” ²²Huenan di, migbatas Dabid i sa lawa’t wayeg Holdan lapeg sa langun дума di. Agulé nekebatas da langun egoh di tumeleséng dé sa agdaw.

²³Na, egoh i Ahitopél neketiig endà pinangunutan i Absalom duu sa igdadan di, siniyaan di sa asnu di owoy miglikù diyà sa hagdi menuwa. Agulé tinapay di sa mepion keugpà sa malayan di, hê migpebitin. Agulé nematay owoy iglebeng da diyà sa lebengan sa emà di.

Ini Sa Egeh I Dabid Mig-angay Diyà Mahanaim

²⁴Agulé mig-angay Dabid i diyà menuwa Mahanaim. Dodoo si Absalom lapeg sa langun sundalu tegeIslaél, migbatas da diyà sa lawa’t wayeg Holdan.

²⁵Egoh iya, si Amasa sa igsambì i Absalom si Hoab tigtu ulu-ulu sa medoo sundalu. Na, si Amasa anak i Hitél’ tegeIslaél sa migsawa si Abigél anak i Nahas дума telehadi i Seluwaya inay i Hoab. ²⁶Na, migkampù Absalom i owoy sa medoo tegeIslaél dutu tanà Galaad dò.

²⁷Na, egoh i Dabid migtebow diyà menuwa Mahanaim,

tinelabuk i Sobi anak i Nahas tegeAmon kedu diyà Laba owoy si Makil anak i Amiyél tegeLo-Débal owoy si Balsilay tegeGalaad kedu diyà Logilim.

²⁸Mig-uwit da sa medoo ikam, sa medoo kayab, owoy medoo kuden tanà owoy medoo limpung. Mig-uwit da ma sa medoo teligo, owoy sébada, owoy alina owoy pinipi owoy medoo balangan belotung, ²⁹owoy teneb, owoy sa gatas pinetegas, owoy sa medoo kebilibili. Igbegay da iya wé diyà si Dabid lapeg sa medoo etaw di, enù ka iya sa penemdem da egpeketues sa medoo etaw owoy eglupahan da owoy neliteg da ma danà sa kinebegtas da diyà sa begangbegang.

Ini Sa Egeh I Absalom Nelugpì Owoy Neimatayan

18 ¹Na, sinetipon i Dabid sa medoo etaw mig-unut kenagdi owoy miggelal kaunutan diyà sa uman geumpung. Duen sa umpung ngibuwan owoy duen sa umpung gatusan. ²Agulé pineangay i Dabid kagda owoy sinepalak di telu geumpung. Si Hoab sa migpangulu sa sebaen umpung, si Abisay anak i Seluwaya дума telehadi i Hoab sa migpangulu sa keduwa di, owoy si Itay tegeGita sa migpangulu sa ketelu di umpung. Mig-ikagi Datù Dabid i diyà kenagda, guwaen di, “Umunut a keniyu gumila.”

³Dodoo mig-ikagi sa medoo etaw diyà kenagdi, guwaen

¹17:25 Si Itéla ma sa ngadan di.

da, “Yaka eg-unut ta enù ka amuk melaguy ké endà duen sa mekesagipà keniko. Apiya di pa mebaed sa kedoo ké mematay, endà pedakelan pedu da kami, dodoo kuna lagà ka sepulù ngibu diyà kenami, huenan di mepion pa petangtang ka diyà sa menuwa owoy peuwiti ko daa diyà kenami sa itabang ko.”

⁴Agulé mig-ikagi Dabid, guwaen di, “Baelan ku sumalà dé sa niyu penemdem.” Huenan di, migtigdeg Datù Dabid i diyà sa bengawan ligò da egtalà sa medoo sundalu sa medoo umpung gatusan owoy sa umpung ngibuwan. ⁵Migsugù Datù Dabid i diyà si Hoab owoy Abisay owoy Itay, guwaen di, “Yoko egpesakitan duu Absalom i.” Nekedineg sa langun sundalu sa inikagi sa datù denu sa baelan da diyà si Absalom.

⁶Huenan di, mig-ipanaw sa medoo sundalu i Dabid anì atuwan da sa medoo tegeIslaél, owoy nesegila da diyà sa ketalunan tanà Ipelaim. ⁷Hê, nelugpì sa medoo tegeIslaél danà sa medoo sundalu i Dabid owoy duwa lagsà sa nematay egoh iya agdaw. ⁸Nekesuluh sa kesegilaway diyà iya wé tanà. Owoy egoh iya agdaw, uman pa medoo sa nematay danà sa ketalunan diyà sa danà sundang.

⁹Na, egkudà asnu Absalom i egoh di nekesiegung sa medoo sundalu i Dabid, owoy eg-ukit diyà sa leketanà sa panga sa dakel kayu énsina. Hê, nekesanggat sa balut ulu di diyà sa panga kayu ligò di

migpekelus egetu sa asnu di, agulé migsodoysodoy Absalom i.

¹⁰Na, egoh sa etaw i Dabid mighaa ini i, mig-angay egtulon diyà si Hoab, guwaen di, “Hinaa ku Absalom i migsodoysodoy diyà sa kayu énsina.”

¹¹Mig-ikagi Hoab i diyà sa etaw migtulon kenagdi, guwaen di, “Tuu hinaa ko kagdi? Maen di ya atu endà inimatayan ko duu? Amuk inimatayan ko hedem, begayan ku kuna sepulù pilak owoy sebaen metolol sabitan sundalu.”

¹²Dodoo migsagbì, guwaen di, “Apiya di pa begayan ko aken sengibu pilak, endà imatayan ku duu sa anak sa datù, enù ka dinineg ké sa igsugù sa datù diyà keniko owoy diyà si Abisay owoy Itay sa egoh di endà mebaluy di pesakitan Absalom i. ¹³Owoy amuk imatayan ku Absalom i, agulé amuk meketiig sa datù denu ini i, beken kuna sa mekesagbì diyà sa nebaelan enù ka endà duen melidung diyà kenagdi.”

¹⁴Na, mig-ikagi Hoab i, guwaen di, “Maen dé iya wé, ipehaa ku keniko sa baelan ku.” Agulé migkuwa telu sigpù owoy igtebek di diyà sa selatal pusung i Absalom ligò di nehagtay pelà nekehowilhowil diyà sa kayu énsina. ¹⁵Agulé inulingutan sa sepulù tegeuwit kinemkem i Hoab Absalom i owoy inutasan da. Hê, nematay Absalom i.

¹⁶Agulé migtegbuli Hoab i anì sumabuh sa medoo sundalu di eglohot diyà sa medoo tegeIslaél. ¹⁷Hê, inuwit da Absalom i owoy

ninabù da diyà sa medalem tosong diyà sa ketalunan owoy hinasekan da medoo batu. Agulé migpelaguy sa langun tegeIslaél diyà sa hagda dalesan.

¹⁸Na, egoh i Absalom nehagtay pelà, pinetigdeg di sa pelous dutu siedò Sugud Datù enù ka mig-ikagi, guwaen di, “Endà duen sa anak ku maama sa mekeuwit sa ngadan ku.” Huenan di, pinengadanan di sa pelous sa hagdi munoy ngadan owoy taman ini egoh di pinengadanan da ini i Ladyawan i Absalom.

Ini Sa Egoh I Dabid Netulonon Sa Kinepatay I Absalom

¹⁹Na egoh iya, mig-ikagi Ahimaas i anak i Sadok diyà si Hoab, guwaen di, “Peangay ko aken diyà sa datù anì metulon ku diyà kenagdi sa egoh i Datù Nemula mig-aluk kenagdi kedu diyà sa medoo kuntelà di.”

²⁰Migsagbì Hoab i, guwaen di, “Beken kuna sa enget tumulonon sa datù ini egoh. Mebaluy amuk diyà sa liyu pa agdaw, dodoo beken ini egoh di enù ka nematay sa anak sa datù.”

²¹Aglulé mig-ikagi Hoab i diyà sa tegeKus, guwaen di, “Ipanaw ka, angay ko tuloni sa datù sa hinaa ko.” Hê, migligkued sa tegeKus diyà sa taengan i Hoab anì adatan di, agulé migletu.

²²Aglulé mig-ikagi dema Ahimaas i diyà si Hoab, guwaen di, “Apiya ngadan sa mebaelan, pandayà ko aken lumohot sa tegeKus.”

Dodoo migsagbì Hoab i, guwaen di, “O Adug, maen di ya

mangay ka ma dutu? Netiigan ko doo endà duen untung sakemen ko diyà sa ketulon ko.”

²³Mig-ikagi dema Ahimaas i, guwaen di, “Apiya ngadan sa mebaelan, umangay a doo.”

Huenan di sinagbian i Hoab, guwaen di, “Na, ipanaw ka dé.” Agulé migletu Ahimaas i mig-ukit diyà sa sugud owoy hinunawan di sa tegeKus.

²⁴Na egoh iya, egpenuu Dabid i diyà sa teliwadà sa duwa bengawan owoy miggemow sa tegebantay diyà sa atep sa bengawan medapag diyà sa kutà. Hê, hinaa di sa sebaen etaw epletu. ²⁵Aglulé pinetaled sa tegebantay sa kagi di egtulon diyà sa datù.

Mig-ikagi sa datù, guwaen di, “Amuk sebaen di daa, petow ta daa duen sa mepion tulonen di.”

Ligò di migkedapag sa tegesugkow, ²⁶hinaa sa tegebantay sa sebaen ma etaw epletu, owoy mig-umow diyà sa tegeipat bengawan, guwaen di, “Haa ko. Duen sa sebaen ma etaw epletu!”

Mig-ikagi sa datù, guwaen di, “Amuk hediya, duen ma sa mepion tulonen di.”

²⁷Aglulé mig-ikagi sa tegebantay, guwaen di, “Sa muna epletu, hediya ka keletu i Ahimaas sa anak i Sadok.”

Hê, mig-ikagi sa datù, guwaen di, “Mepion etaw kagdi ya, owoy eg-uwit doo sa mepion tulonen.”

²⁸Aglulé mig-umow Ahimaas i diyà sa datù, guwaen di, “Mepion tulon.” Agulé migligkued diyà sa taengan sa

datù taman neketenà diyà sa tanà sa kilay di owoy mig-ikagi, guwaen di, “Meolò Datù Nemula i, sa Nemula eggigtuuwen ko. Pinetaban di kuna diyà sa medoo etaw egkuntelà keniko.”

²⁹Mig-igsà sa datù, guwaen di, “Enù egoh i Absalom i?” Migsagbi Ahimaas i, guwaen di, “Egoh i Hoab migsugù kenak owoy sa sebaen ma egsugùsuguen di, hinaa ku sa dakel bogo dutu, dodoo endà netiigan ku duu iya wé.”

³⁰Mig-ikagi sa datù diyà kenagdi, guwaen di, “Tigdeg ka dahiya owoy angkat-angkat ka.” Huenan di, mig-ilud owoy migtigdeg dahiya.

³¹Agulé migtebow sa tegeKus owoy mig-ikagi, guwaen di, “O Datù, mepion tulonen atang diyà sa kaunutan ku! Inalukan i Datù Nemula kuna ini egoh di diyà sa langun eg-atu diyà keniko.”

³²Mig-igsà sa datù diyà sa tegeKus, guwaen di, “Enù egoh i Absalom i?” Migsagbi sa tegeKus, guwaen di, “O Datù Meadatan, mekeiling hedem si Absalom sa langun kuntelà ko.”

³³Na, tigtu nebukul sa datù. Miggemow diyà sa bilik lekeatas sa bengawan owoy migsinegaw. Ini sa kagi di egsinegaw, guwaen di, “O Absalom, anak ku, O Absalom, anak ku! Mepion pa hedem amuk aken polo sa nematay, beken kuna. O Absalom, anak ku! Anak ku!”

Ini Sa Egoh I Hoab Migbulit Si Dabid

19 ¹Na, tinulonon da Hoab i, guwaen da, “Eghuyhuy

sa datù owoy egkebukul danà i Absalom.” ²Huenan di, nebaluy polo kebukulan diyà sa medoo etaw sa egoh da migtaban egoh iya agdaw, enù ka nebukul sa datù danà sa anak di nematay.

³Agulé migpelipoh-lipoh sa medoo etaw eg-awoh diyà sa menuwa nekeiling sa medoo etaw eg-awoh diyà sa menuwa amuk tinabanan da eggila. ⁴Hê, linimunan sa datù sa palas di owoy pinetaled di sa kesinegaw di, guwaen di, “O anak ku, Absalom! O Absalom, anak ku!”

⁵Agulé mig-angay Hoab i diyà sa dalesan i Dabid owoy mig-ikagi diyà sa datù, guwaen di, “Egpemalaen ko ini egoh sa langun sundalu, sa mig-aluk sa hagtay ko lapeg sa medoo anak ko owoy sa langun sawa ko. ⁶Eghiduwan ko sa egkelepuh keniko owoy egkelepuhan ko polo sa mehidu keniko. Ini egoh di igpetiig ko endà duen ulan di diyà keniko sa medoo kaunutan owoy sa medoo sakup ko. Netiigan ku meanggan ka amuk nehagtay Absalom i owoy amuk kami langun sa nematay. ⁷Huenan di, tigdeg ka dé. Laun ka owoy pebagel ko sa medoo etaw ko, enù ka igpengibet ku diyà si Datù Nemula amuk endà umangay ka diyà kenagda, endà dumuen etaw mesamà diyà keniko amuk sumigep kani. Amuk hediya, uman pa medaet ini i diyà keniko enù ka lumowon ini i diyà sa langun kelikutan neukitan ko edung egoh ko batàbatà pelawà taman ini egoh di.”

⁸Agulé migtigdeg sa datù owoy mig-angay egpenuu diyà sa dapag bengawan. Hê, egoh sa medoo etaw neketiig iya wé, migpedapag da langun diyà kenagdi.

Ini Sa Egeh I Dabid Miglikù Héluasalém Dò

Na egoh iya, miglidung diyà sa dalesan da sa medoo tegeIslaél migtampil diyà si Absalom.

⁹Agulé nesesigbolow sa langun tegeIslaél owoy egseikagiyay da, guwaen da, “Inalukan i Datù Dabid kita kedu diyà sa medoo kuntelà ta lapeg sa medoo tegePilistiya. Dodoo ini egoh di linegkaan di sa hagdi tanà danà i Absalom. ¹⁰Dodoo nematay danà gila Absalom i sa ginela ta datù. Huenan di, maen di ya endà egpenemdem yu duu pelikù Dabid i diyà sa menuwa di anì pedatù dema?”

¹¹⁻¹²Na, egoh i Dabid nekedineg denu sa inikagi sa medoo tegeIslaél, migpeuwit kagi diyà sa tegesimbà si Sadok owoy Abiyatal anì umigsà da diyà sa medoo kaunutan diyà tanà Huda. Guwaen di, “Maen di ya egpekehudihudi yu eg-uwit kenak pelikù diyà sa dinelingding ki sebaen daa sa puun ta?” ¹³Agulé mig-uman Dabid i eg-ikagi diyà kenagda, guwaen di, “Tuloni yu Amasa i sa duma telehadi ku ka gelalen ku kagdi kaunutan sundalu isambì ku si Hoab. Amuk endà baelan ku duu ini i, hedem pigtamayan i Nemula aken.”

¹⁴Agulé nealiyug i Dabid sa langun tegeHuda, huenan di

nesesebaen sa pedu da egpeuwit kagi diyà kenagdi, guwaen da, “Pelikù ka dé dini lapeg sa medoo etaw ko.”

¹⁵Huenan di, ligò i Dabid egpelikù, siniegung sa medoo tegeHuda diyà sa lawa't wayeg Holdan. Nesetipon siini medoo etaw diyà Gilgal anì tabangan da sa datù matas sa lawa't wayeg. ¹⁶Hê, migpetéél Simi i anak i Géla tegeBénhamin kedu diyà Bahulim migpeunut diyà sa medoo tegeHuda egkelakawan sumiegung si Datù Dabid. ¹⁷Mig-unut diyà kenagdi sa sengibu etaw tegeBénhamin, lapeg ma si Siba sa egsugùsuguen i Saulo owoy sa sepulù owoy lima maama anak di lapeg sa duwa pulù udipen di. Egkelakawan da eg-angay dutu Holdan dò anì siegungen da Datù Dabid i. ¹⁸Binatas da sa keladayan wayeg anì angayen da sa malayan di, owoy pinangunutan da sumalà dé sa igsugù di.

Ini Sa Mepion Binaelan I Dabid Diyà Si Simi

Na, egoh i Simi anak i Géla migbatas sa lawa't Holdan, migligkued diyà sa taengan sa datù ¹⁹owoy mig-ikagi, guwaen di, “O Datù Meadatan, ungayà ku endà pesalaen ko duu aken. Amuk mebaluy, yaka dé egpenemdem duu sa medaet binaelan ku egoh iya wé agdaw egoh ko miglegkà diyà Héluasalém. Hedem kelipengan ko dé iya wé. ²⁰Enù ka netiigan ku nekesalà a, aken

i egsugùsuguen ko. Huenan di, mighuna a eg-angay dini diyà sa langun tegeIslaél eg-ugpà denu belabagan anì sumiegung a sa datù ku.”

²¹Agulé mig-ikagi Abisay i anak i Seluwaya, guwaen di, “Beken atu enget imatayan Simi i enù ka tinubad di sa datù hinemilì i Datù Nemula?”

²²Dodoo migsagbì Dabid i, guwaen di, “Kiyu i medoo anak i Seluwaya, endà nesesebaen sa pedu ta. Nebaluy medoo kuntelà ku kiyu ini egoh. Aken dé sa datù diyà sa uwang tanà Islaél ini egoh, huenan di endà mebaluy di dumuen sa uman meimatayan diyà tanà Islaél ini egoh di.” ²³Huenan di, mig-ikagi sa datù diyà si Simi, guwaen di, “Ipengibet ku endà mematay ka!”

²⁴Na, mig-angay ma dutu Mèpibosét i bébê i Saulo anì sumiegung si Datù Dabid. Endà pineguséén di duu sa lisen di ataw ka ginuntingan di sa benget di ataw ka pinipian di sa ginis di edung egoh i Dabid miglegkà diyà Hélušalém taman egoh di nekepelikù metanà. ²⁵Hê, egoh di migtebow kedu diyà Hélušalém anì sumiegung sa datù, inigsaan sa datù, guwaen di, “O Mèpibosét, maen di ya endà mig-unut ka kenak?”

²⁶Migsagbì, guwaen di, “O Datù Meadatan, danà ku pikat, aken i egsugùsuguen ko. Migpegeni a anì siyaan sa asnu ku anì umunut a sa datù. Dodoo endà migpangunut sa egsugùsuguen ku si Siba, ²⁷owoy sinumbung di polo aken diyà

keniko. O Datù Meadatan, lagà ka sa egsugùsuguen i Nemula, huenan di baeli ko sumalà dé sa egkeiyapan ko. ²⁸Netiigan ku enget imatayan ko sa langun tugod sa bébê ku, dodoo pinedakel ko aken i egsugùsuguen ko danà ko egpeunut kenak egkaen diyà sa lamisan ko. Huenan di, endà duen sa ketuu ku anì muman a pa megeni diyà keniko.”

²⁹Agulé mig-ikagi Dabid i diyà kenagdi, guwaen di, “Maen di ya egpedoowen pa sa kagi? Egsuguen ku kiyu si Siba anì sebaeden yu sa medoo hinemulaan i Saulo.”

³⁰Hê, migsagbì Mèpibosét i, guwaen di, “Begayi ko dé sa langun diyà kenagdi, enù ka enget dé diyà kenak sa kepelikù ko metanà.”

Ini Sa Mepion Binaelan I Dabid Diyà Si Balsilay

³¹Na, miglungel ma Balsilay i tegeGalaad kedu diyà Logilim anì tabangan di sa datù matas sa lawa’t Holdan anì lumikù. ³²Lukes dé Balsilay i, enù ka nekeuma dé walu pulù gepalay. Ginastuwan di Dabid i egoh di diyà Mahanaim enù ka tigtu kawasà. ³³Agulé mig-ikagi Dabid i diyà kenagdi, guwaen di, “Unut ka kenak batas owoy ugpa ka dutu Hélušalém dò, owoy aken dé sa gumastuwan keniko.”

³⁴Dodoo migsagbì Balsilay i, guwaen di, “Pila daen gepalay sa lugay ku mehagtay? Endà duen ulan sa keunut ku keniko mangay diyà Hélušalém? ³⁵Walu

pulù dé gepalay sa kelukes ku, owoy endà dé netiigan ku duu tayu di sa mepion owoy sa medaet. Menanaman ku pa atu sa egkaenen ku owoy sa eg-inemen ku? Medineg ku pa atu ligeng sa keduyuy sa medoo maama owoy bayi? Mebegatan ka daa diyà kenak, o Datù. ³⁶Na, medapag daa sa angayan ku matas munut sa datù mangay tanà dutu sa lawa't Holdan. Huenan di, endà duen ulan di amuk begayan a sa datù untung lagà ini i. ³⁷Pelikù ko polo aken anì mematay a diyà sa menuwa ku dapag diyà sa lebengan sa emà ku owoy inay ku. Dodoo kaini sa anak ku si Kimham. Uwit ko batas owoy baeli ko diyà kenagdi sumalà dé sa egkeiyapan ko.”

³⁸Agulé mig-ikagi sa datù, guwaen di, “Na, peunuten ku Kimham i diyà kenak matas, owoy baelan ku diyà kenagdi sumalà dé sa enget diyà sa kehaa ko, owoy baelan ku ma diyà keniko sumalà dé sa eg-ungayaen ko diyà kenak.”

³⁹Hê, linagap i Dabid Balsilay i owoy binagian di. Agulé migbatas Dabid i sa lawa't Holdan lapeg sa langun etaw di. Dodoo miglikù Balsilay i diyà sa menuwa di.

⁴⁰Na, egoh sa datù nekebatas dé, mig-angay diyà Gilgal lapeg si Kimham owoy sa langun sundalu sa tegeHuda owoy baed sundalu sa tegeIslaél.

⁴¹Dodoo endà iseg di nelugay, mig-angay sa medoo tegeIslaél

diyà si Dabid owoy igsumbung da sa binaelan sa medoo tegeHuda sa mig-uwit kenagdi egbatas lapeg sa malayan di owoy sa langun etaw di. ⁴²Agulé migsagbì sa medoo tegeHuda diyà kenagda, guwaen da, “Binaelan ké ini i enù ka duma telehadi ké sa datù. Maen di ya egbulit yu denu ini i? Endà migkaen ké sa mekaen sa datù, owoy endà ma duen sa igbegay di uloy diyà kenami.”

⁴³Hê, migsagbì sa medoo tegeIslaél diyà sa medoo tegeHuda, guwaen da, “Sepulù ké geumpung tugod i Islaél, huenan di sepulù gebaed sa ketuu ké diyà sa datù.”^m Na, maen di ya egpeumàmaan yu kami? Beken atu kami sa muna mig-ikagi denu sa kepelikù sa datù ta?” Dodoo uman pa mesakit sa kesagbì sa medoo tegeHuda diyà sa kesagbì sa medoo tegeIslaél.

Ini sa Egoh I Séba Migkuntelà Si Dabid

20 ¹Na, duen sa etaw tegebogo si Séba anak i Bikli tegeBénhamin. Migtegbuli owoy mig-ikagi metaled, guwaen di, “O medoo tegeIslaél, endà duen labut ta diyà si Dabid anak i Hési! Lumikù ki langun!”

²Huenan di, sinalidan sa medoo tegeIslaél Dabid i owoy mig-unut da diyà si Séba anak i Bikli. Dodoo mig-unut sa medoo tegeHuda diyà sa datù da, owoy

^m 19:43 Mig-ikagi da ini i enù ka sepulù getugod da eg-ugpà denu belabagan sa tanà Islaél. Egtigesawen da sa tugod i Huda eg-ugpà diyà gimataan.

dinumawan da kagdi kedu diyà lawa't Holdan taman Hélusalém dò.

³Na, egoh i Dabid miglikù diyà sa dinelingdingan diyà Hélusalém, igsugù di anì uwiten da diyà sa sebaen dalesan sa sepulù lagdà sawa di sa pineugpà di atung umipat sa dinelingdingan di, owoy igpebantay di kagda. Ginastuwan di kagda dodoo endà eghuliden di duu. Mig-ugpà da dutu lagà bayi balu taman sa egoh da nematay.

⁴Agulé mig-ikagi sa datù diyà si Amasa, guwaen di, “Sasai ko sa langun sundalu tegeHuda anì mangay da diyà kenak owoy kuna ma diyà sa ketelu di agdaw edung ini egoh di.” ⁵Huenan di, mig-ipanaw Amasa i owoy igsasà di sa medoo sundalu tegeHuda, dodoo endà nekepelikù di diyà sa agdaw inikagi sa datù diyà kenagdi.

⁶Agulé mig-ikagi sa datù diyà si Abisay, guwaen di, “Uman pa medaet sa baelan i Séba diyà sa binaelan i Absalom. Huenan di, uwit ko sa medoo etaw ku owoy lohohot yu kagdi. Petow ta daa mepeka di sa medoo kinutà menuwa owoy mekepelaguy kedu diyà kenita.” ⁷Huenan di, miglegkà Abisay i kedu menuwa Hélusalém dò anì lohohoten da Séba i anak i Bikli. Inuwit di Hoab i lapeg sa medoo etaw di owoy sa medoo tegebantay i Dabid tegeKélét owoy tegePélét, owoy sa langun mebalaw sundalu.

⁸Na, egoh da diyà sa dakel batu diyà Gibiyon, tinelabuk i

Amasa kagda. Nekeginis Hoab i sa ginis sundalu owoy mig-abing guluk. Hê, egoh di egdapag diyà si Amasa, egkenokoten di eghugut sa guluk di. ⁹Mig-ikagi diyà si Amasa, guwaen di, “Enù egoh sa egkebaelan ko, loyok?” Agulé sinabaan di kuwanan belad sa benget i Amasa anì ingadekan di gaa. ¹⁰Dodoo endà neilapan i Amasa duu sa guluk diyà sa bibang belad i Hoab. Hê, tinebek i Hoab diyà sa getek di owoy nebuwadas sa tagaken di diyà tanà. Agulé nematay, huenan di endà dé dinuli i Hoab duu egtebek. Agulé, migpelagbas Hoab i owoy Abisay hadi di anì lohohoten da Séba i anak i Bikli.

¹¹Hê, migtigdeg sa sebaen etaw i Hoab diyà sa dapag i Amasa, owoy migpetaled eg-ikagi diyà sa medoo etaw i Amasa, guwaen di, “Amuk egtampil yu diyà si Hoab owoy si Dabid, unut yu dé diyà si Hoab!”

¹²Na egoh iya, egligtuoltuol Amasa i diyà sa teliwadà dalan owoy nepedigus depanug sa lawa di. Sumalà dé sa mighaa kenagdi, eg-etud da. Huenan di, egoh sa etaw i Hoab neketiig denu iya wé, ginodoy di sa lawa i Amasa kedu diyà sa dalan mangay diyà sa galebekan, agulé linimunan di ginis. ¹³Na, egoh di dé nekedan sa lawa i Amasa diyà dalan, migpelagbas da langun eg-unut si Hoab anì lohohoten da Séba i.

¹⁴Na, lininggil i Séba sa medoo geumpung tugod i Islaél anì setiponen di sa langun duma di. Agulé mig-unut da

kenagdi eg-angay diyà menuwa Abél Bét Maaka. ¹⁵Na, egoh i Hoab owoy sa medoo etaw di neketiig iya wé, mig-angay da Abél Bét Maaka dò owoy sineulingutan da. Dinugkowon da tanà owoy batu sa kilidan sa kutà anì mekedagseg da, owoy egdugkulen da batang sa kutà anì megubal. ¹⁶Na, duen sa bayi épê medalem penemdem dalem sa menuwa mig-umow metaled diyà sa medoo etaw i Hoab, guwaen di, “Dinegdineg yu diyà kenak! Ikagiyi yu Hoab ya anì mangay diyà kenak enù ka ungayà ku mikagi diyà kenagdi.” ¹⁷Agulé mig-angay Hoab i diyà kenagdi, owoy mig-igsà sa bayi, guwaen di, “Kuna pa Hoab i?”

Migsagbi Hoab i, guwaen di, “Hoò, aken.”

Mig-ikagi sa bayi, guwaen di, “O Datù, dinegdineg ko sa eg-ikagiyen ku diyà keniko.” Migsagbi Hoab i, guwaen di, “Na, duminegdineg a.”

¹⁸Mig-ikagi sa bayi, guwaen di, “Duen sa milantek kagi egoh anay, guwaen da gaa amuk ungayà yu meantang sa kelikutan yu, pegeni yu sa dadan diyà menuwa Abél. ¹⁹Na, kami sa eg-ungayà anì mekepelagbas sa melanih keugpà owoy kami ma sa tigtu kesaligan diyà tanà Islaél. Dodoo kuna, maen di ya eg-ungayaen ko pedaetan sa miulan menuwa diyà tanà Islaél? Maen di ya ungayà ko pedaetan sa menuwa i Datù Nemula?”

²⁰Migsagbi Hoab i, guwaen di, “Beken iya sa ungayà ku

anì pedaetan sa menuwa yu. Owoy endà ma ungayà ku duu mimatay keniyu. ²¹Beken duu iya sa kinelol ké. Migpengayaw ké polo danà i Séba anak i Bikli kedu diyà sa getan-getan sa tanà Ipelaim. Kagdi sa migkuntelà diyà si Datù Dabid. Begayi yu diyà kenami anì lumegkà ké diyà sa menuwa yu.”

Agulé mig-ikagi sa bayi, guwaen di, “Ibuung ké sa ulu di diyà keniko kedu diyà sa kutà.”

²²Agulé mig-angay sa bayi diyà sa medoo duma di diyà sa menuwa owoy tinulon di diyà kenagda sa milantek penemdem di. Hê, tinagped da sa ulu i Séba owoy igbuung da diyà si Hoab. Agulé, migtegbuli Hoab i, owoy miglegkà sa medoo etaw di diyà sa menuwa owoy miglikù da. Owoy miglikù ma Hoab i diyà sa datù diyà Héluasalém.

Ini Sa Medoo Ulu-ulu Sinaligan I Dabid

²³Na, si Hoab sa tigtu ulu-ulu sa langun sundalu tegeIslaél. Si Bénaya anak i Héhoyada sa ulu-ulu diyà sa medoo tegeKélét owoy medoo tegePélét sa atung tegebantay i Dabid.

²⁴Si Adonilam sa sinaligan sa medoo udipen sa egpegesen egpegalebek. Si Héhosapat anak i Ahilud sa tegeipat sa medoo surat denu sa kedatuan.

²⁵Si Siba sa tegesulat sa datù, owoy si Sadok owoy Abiyatal sa tegesimbà, ²⁶owoy si Ila tegeHayél sa munoy tegesimbà i Dabid.

**Ini Sa Egeh Sa Medoo Tugod
I Saulo Inimatayan Sa Medoo
TegeGibiyon**

21 ¹Na, egoh i Dabid telibubu egpedatù, duen sa dakel bitil taman telu gepalay. Huenan di migpegeni tabang Dabid i diyà si Datù Nemula. Agulé migsagbì Nemula i, guwaen di, “Migduen sa dakel bitil danà i Saulo lapeg sa malayan di mig-imatay sa medoo tegeGibiyon.”

²Na, siini medoo tegeGibiyon beken duu tegeIslaél, dodoo kagda sa medoo nesamà tegeAmoliya. Egoh anay migpasad sa medoo tegeIslaél sa egoh da endà mimatay kenagda, dodoo ungayà i Saulo polo kagda kedanan danà di eg-udes eg-ipat sa tanà Islaél owoy tanà Huda. Na, igsasà i Dabid sa medoo tegeGibiyon. ³Owoy mig-igsà, guwaen di, “Ngadan sa baelan ku diyà keniyu anì metigtuwan sa salà binaelan i Saulo diyà keniyu? Tuloni yu aken anì bagian i Nemula dema sa medoo etaw di.”

⁴Migsagbì sa tegeGibiyon, guwaen da, “Endà mebayadan di pilak ataw ka bulawan sa nami kebulit diyà si Saulo lapeg sa malayan di. Owoy endà duen sa nami ketuu eg-imatay muni dé etaw diyà sa tanà Islaél liyu daa amuk hoèden ko.”

Agulé mig-igsà Dabid i, guwaen di, “Ngadan sa ungayà yu baelan ku diyà keniyu?”

⁵Migsagbì da, guwaen da, “Eg-apasen i Saulo kami

mimatayan anì endà duen sa mesamà kenami diyà sa tanà Islaél. ⁶Huenan di, begayi yu diyà kenami sa pitu tugod di maama, enù ka imatayan ké kagda. Agulé pandayaen ké sa lawa da diyà sa kehaa i Nemula dutu menuwa Gibiyon dò sa menuwa i Saulo sa datù hinemili i Nemula egoh anay.”

Hê, mig-ikagi sa datù, guwaen di, “Na, ibegay ku kagda diyà keniyu.”

⁷Dodoo endà igbegay i Dabid duu diyà kenagda Mépibosét i anak i Honatan bébê i Saulo, danà sa nesesadan da si Honatan diyà sa taengan i Nemula. ⁸Hê, igbegay i Dabid polo sa duwa anak i Saulo, si Almoni owoy si Mépibosét anak i Lispa bébê i Aya. Igbegay i Dabid ma sa lima maama anak i Mélab bébê i Saulo. Si Mélab sa sawa i Adlél anak i Balsilay tegeMihola. ⁹Igbegay i Dabid kagda diyà sa medoo tegeGibiyon, owoy inimatayan da sa pitu geetaw diyà sa tuduk medapag diyà sa kenà da egsimbà diyà si Nemula. Owoy pinandayà da daa dutu sa medoo lawa sa nematay. Nebaelan ini i diyà sa muna agdaw keketu sa sébada.

¹⁰Na, egkuwa sakù Lispa i anak i Aya owoy binekah di diyà sa batu anì umidegà. Inunungan di sa lawa sa medoo nematay anì endà kaenen sa medoo manuk awang duu amuk agdaw owoy endà ma kaenen sa medoo uled tanà duu amuk sigep. Eg-ugpà dutu edung sa sasang keketu taman sa sasang udan. ¹¹Na,

egoh i Dabid tinulonon da sa binaelan i Lispa lagdà sawa i Saulo, ¹²mig-angay dutu Habés Galaad dò anì kuwaen di sa tuelan i Saulo owoy si Honatan anak di. Na, egoh sa medoo tegePilistiya mig-imatay si Saulo owoy si Honatan anak di dutu tuduk Gilbowa dò, binitin da kagda diyà sa melabel duwangen kenà sa medoo etaw atung egkesetipon diyà menuwa Bét San, agulé pinenakaw sa medoo tegeHabés Galaad sa lawa da dutu. ¹³Inuwit i Dabid sa medoo tuelan i Saulo owoy si Honatan anak di, lapeg sa tuelan sa medoo etaw inimatayan sa tegeGibiyon.

¹⁴Agulé iglebeng da sa medoo tuelan diyà sa lebengan i Kis emà i Saulo, dutu menuwa Séla dò diyà tanà Bénhamin. Pinanguntan da sa langun igsugù i Dabid diyà kenagda. Na, egoh di neubus iya wé, sinagbian i Nemula sa kesimbà da anì sumabuh dé sa bitil diyà sa uwang tanà da.

Ini Denu Sa Kesegilaway Sa TegePilistiya Owoy TegeIslaél

¹⁵Na sebaen agdaw, nesegila dema sa medoo tegePilistiya owoy sa medoo tegeIslaél. Mig-unut ma Dabid i diyà sa medoo sundalu di anì gilawen da sa medoo tegePilistiya, dodoo neliteg owoy nelugpay. ¹⁶Na, si Isbibénob tugod i Lapa sa sebaen sundalu tegePilistiya, eg-udesan di mimatay Dabid i. Migkembem magtu sundang owoy nekeuma telu kakilu owoy

tengà sa kebegat sa ebà sigpù di. ¹⁷Dodoo inangay i Abishay anak i Seluwaya eg-alukan Dabid i, owoy inimatayan di iya wé tegePilistiya. Agulé mig-ikagi sa medoo etaw i Dabid diyà kenagdi, guwaen da, “Endà dé meiyap ké amuk umunut ka uman diyà kenami diyà sa kesegilaway. Endà meiyapan ké duu amuk mekedan ka, enù ka lagà ka sa sulù diyà tanà Islaél.”

¹⁸Na, neuma dema sa kesegilaway sa medoo tegePilistiya owoy sa medoo tegeIslaél dutu Gob dò. Egoh da egkeseatu, neimatayan i Sibakay tegeHusah Sap i sa sebaen tugod i Lapa.

¹⁹Hê, egoh da nesegila dema diyà Gob, inimatayan i Élhanaan anak i Hali-Olégim tegeBétléhém sa hadi i Gulayat tegeGat. Sa kekepal sa degdegan sigpù di iling kekepal sa igsegseg polu sa eghabelen.

²⁰Na, nesegila dema sa medoo tegePilistiya owoy sa medoo tegeIslaél diyà Gat. Egoh iya, nekebalà da sa mangkag etaw tugod i Lapa sig-enemay sa kemel belad di owoy kemel lisen di. ²¹Hê, egoh di migpeumàumà sa medoo tegeIslaél, inimatayan i Honatan anak i Simiya kakay i Dabid iya wé etaw.

²²Na, inimatayan i Dabid owoy sa medoo sundalu di siini epat tegePilistiya tugod i Lapa tegeGat.

Ini Sa Duyuy I Dabid Egoh Di Migtaban

22 ¹Na, migduyuy Dabid i eg-olò si Nemula egoh

i Nemula mig-alukan kenagdi kedu diyà si Saulo owoy diyà sa medoo kuntelà di. ²⁻³Ini sa duyuy di:

Kuna, o Datù Nemula, sa dakel Batu ku, sa megamel batu kenà ku egpedidalung owoy sa tegealuk ku. Kuna sa dakel batu kenà ku endà duen kenol. Kuna sa kelasag ku owoy sa mebagel kinemkem ku owoy sa atung aputan ku. Kuna sa eg-aluk kenak kedu diyà sa medoo mebalaw etaw.

⁴Meolò ka, Nemula, enù ka amuk megeni a tabang diyà keniko, eg-alukan ko aken kedu diyà sa medoo kuntelà ku.

⁵Sa kepatay lagà lambeg nekeulingut diyà kenak. Sa kelikutan lagà sa bekulud kemahà eglipay pulu ku.

⁶Sa kepatay nekeiling tali nekebedbed kenak, owoy nekeiling ma katal diyà sa ukitan ku.

⁷Diyà sa kelikutan ku, mig-umow a diyà keniko, o Datù Nemula.

Migpegeni a tabang diyà keniko, o Nemula ku, owoy dinineg ko kedu diyà sa Dalesan ko sa kesimbà ku.

⁸Miglinug owoy migkenegkeneg sa uwang tanà, nekayung sa medoo peetokon langit,ⁿ nekayung da danà sa kebulit ko, o Nemula.

⁹Eglaun sa ebel kedu diyà sa idung ko, owoy eglaun ma kedu diyà sa ebà ko sa egdelakab apuy owoy sa baga egsiloy.

¹⁰Inukaan ko sa langit nekeiling sa keawang ko sa ginis ighabeng owoy migtenà ka migkogkog diyà sa meitem gaeb.

¹¹Migkudà ka diyà sa egsugùsuguen ko épê pakpak owoy eglayang egpesegoyong diyà sa polu't kelamag.

¹²Binaelan ko sa deleman sa kenà ko egpelimun. Miglidung ka diyà sa mekepal alung nekebelet kebetukan.

¹³Miglagsag sa dakel senang nekeulingut keniko owoy takà egsilà diyà sa taengan ko.

¹⁴Egkulegung diyà langit sa kagi ko, o Datù Nemula, sa Nemula endà duen miglowon.

¹⁵Pinanà ko silà sa medoo kuntelà ko owoy neseपालak da, agulé mig-angap-angap da egpelaguy.

¹⁶Danà sa keindaw ko owoy kebulit ko, egkeeti sa dagat owoy eghauwen sa getan di. Owoy eghauwen ma sa peetokon sa uwang tanà.

¹⁷Kedu diyà langit kinawà ko aken, owoy igpegaun ko aken kedu diyà sa medalem wayeg.

¹⁸Inalukan ko aken kedu diyà sa medoo mebagel kuntelà ku,

ⁿ22:8 Tuduk sa selepangan sa peetokon sa langit.

- owoy sa medoo egkelepuh
kenak sa uman pa mebagel
diyà kenak.
- ¹⁹Pinengayaw da aken egoh ku
egkelikutan,
dodoo tinabangan ko aken,
o Datù Nemula.
- ²⁰Inuwit ko aken diyà sa
menuwa endà duen kenol.
Inalukan ko aken enù ka
neanggan ka diyà kenak.
- ²¹Pinepion ko aken, o Datù
Nemula, enù ka metudà sa
adat ku,
binagian ko aken enù ka
endà duen sa salà ku.
- ²²Enù ka pinangunutan ku sa
langun kepeukit ko
owoy endà mig-iniyug a diyà
keniko.
- ²³Pinangunutan ku sa langun
uledin ko
owoy endà tinipay ku duu sa
medoo igtulù ko.
- ²⁴Neketiig ka endà duen
mesigbolow diyà sa adat ku
enù ka eg-iwod a diyà salà.
- ²⁵Pinepion ko aken, o Datù
Nemula, enù ka metudà sa
adat ku,
binagian ko aken enù ka
hinaa ko endà duen sa salà
ku.
- ²⁶Kesaligan ka diyà sa medoo
etaw ko mesaligan,
owoy mepion ka ma diyà sa
medoo egbael mepion.
- ²⁷Metudà ka diyà sa etaw
melanìh pedu.
Dodoo diyà sa etaw logkù,
ipehaa ko ma sa eglioyon
keindaw ko.
- ²⁸Tuu doo, eg-alukan ko sa
medoo tegepetukééy,
- dodoo egpetukééyen ko polo
sa medoo tegepedakeldakel.
- ²⁹O Datù Nemula, kuna sa
legdaw ku.
Kuna sa sulù ku diyà deleman.
- ³⁰Danà sa ketabang ko, melugpì
ku sa medoo kuntelà ku
owoy mekagbul ku sa kutà
nekeulingut diyà sa dakel
menuwa.
- ³¹O Datù Nemula, negulub sa
kepeukit ko
owoy mesaligan sa kagi ko.
Kuna sa kelasag diyà sa
langun eg-aput diyà keniko.
- ³²Huenan di kuna daa, o Datù
Nemula, sa nami Nemula
egpigtuuwen,
kuna daa sa mebagel batu
kenà ké egpedialung.
- ³³Kuna sa egbegay sa bagel ku
owoy egtulik sa eg-ukitan ku.
- ³⁴Pinebagel ko sa lisen ku
nekeiling sa lisen seladeng
anì megaga ku sa ketekedeg
diyà sa medoo mehagtaw
getan.
- ³⁵Linayam ko aken diyà sa
kesepatayay
owoy pinebagel ko sa belad ku
egbébét sa mebagel busug.
- ³⁶Egtulikan ko aken nekeiling
kelasag,
huenan di nealukan sa
hagtay ku,
owoy danà sa ketabang ko,
miglalag a.
- ³⁷Pineukit ko aken diyà sa
melanìh dalan,
huenan di endà egpekesiud
sa lisen ku.
- ³⁸Linohot ku sa medoo
kuntelà ku owoy nelugpì ku
kagda.

Endà migpeesud a taman
endà netabanan ku duu
kagda.

- ³⁹Pinedaetan ku kagda!
Nebagtan da diyà sa taengan
ku owoy endà dé nekeenaw
da.
- ⁴⁰O Datù Nemula, binegayan ko
aken bagel diyà sa kegila ku.
Owoy pinetaban ko ma aken
diyà sa medoo kuntelà ku.
- ⁴¹Pinepelaguy ko sa medoo
kuntelà ku,
agulé inimatayan ku kagda.
- ⁴²Migpegeni da tabang, dodoo
endà duen sa mig-aluk
kenagda.
Mig-umow da hedem
diyà keniko, dodoo endà
sinagbian ko duu kagda.
- ⁴³Linupet ku kagda taman
nekeiling da keprung.
Dinekdek ku owoy
sinadsadan ku kagda lagà
libutà diyà sa kalasada.
- ⁴⁴Inalukan ko aken, Nemula,
kedu diyà sa medoo etaw ku
egkuntelà kenak.
Ginelal ko aken datù diyà sa
medoo liyu balangan etaw.
Nebaluy udipen ku sa medoo
etaw kedu diyà sa liyu tanà.
- ⁴⁵Migligkued da diyà kenak
danà da egkelimedangan
owoy migpigtuu da ma diyà
sa igsugù ku.
- ⁴⁶Nekedan sa kebalaw da,
huenan di miglaun da kedu
diyà sa kenà da miglidung
owoy miglukub da danà da
nelimedangan.
- ⁴⁷Kuna sa Nemula nehagtay!
Meolò ka sa megamel Batu
kenà ku eppedidalung.

Egpedakelen ku kuna enù ka
kuna sa Nemula ku tegealuk
kenak.

- ⁴⁸Kuna sa eggsulì sa medoo
kuntelà ku,
owoy igpekamal ko kenak sa
medoo dakel tanà.
- ⁴⁹Inalukan ko aken kedu diyà sa
medoo mebalaw kuntelà ku
owoy pinetaban ko aken diyà
kenagda.
- ⁵⁰Huenan di, pedakelen ku
kuna diyà sa medoo
balangan tanà.
Doyonen ku sa ngadan ko sa
duyuy eg-olò.
- ⁵¹Egbegayan ko dakel keketaban
sa datù hinemilì ko.
Eghiduwana ko Dabid i owoy
sa medoo tugod di taman
melugay.

Ini Sa Sabuhanan Inikagi I Dabid

- 23** ¹Na, si Dabid anak i
Hési pinelalag sa tigtu
tunungan Nemula. Hinemilì
sa Nemula i Hakob kagdi anì
megelal datù. Kagdi sa tegebael
sa medoo duyuy diyà tanà Islaél.
Ini sa sabuhanan kagi di:
- ²“Na, mig-ikagi sa Metiengaw
Suguy i Nemula pineukit
diyà kenak,
sa medoo kagi diyà sa ebà ku
iya sa kagi di.
- ³Mig-ikagi diyà kenak sa Nemula,
sa Batu kenà sa medoo
tegeIslaél eppedidalung,
guwaen di, ‘Sa etaw metudà
kekamal owoy épè
kekelimedang diyà si Nemula,
- ⁴nekeiling letak sa teleséng
agdaw amuk magtu kesimag
asal endà duen alung,

owoy lagà saleg agdaw diyà
sa mosung keluwen amuk
kineditan udan!

⁵Hediya sa malayan ku diyà sa
kehaa i Nemula,
enù ka migbael endà duen
tamanan pasad diyà kenak.
Sa pasad nesusun owoy endà
dé mepelumanan di.
Huenan di, egpigtuu a alukan
i Nemula aken takà
owoy ibegay di diyà kenak sa
langun eg-ungayaen ku.

⁶⁻⁷Dodoo sa medoo etaw
tegebael medaet, ibuung da
daa lagà sa medoo hinemula
épê dugi.
Endà mebaluy di ekupen
belad, dodoo sangkaten
polo
owoy ulowen da diyà sa kenà
da sinetipon.”

Sa Medoo Mebalaw Etaw I Dabid

⁸Na, ini sa medoo mebalaw
etaw i Dabid:

Si Hoséb Basébét tegeTakemon
sa pangulu sa telu mebalaw etaw
i Dabid. Diyà sa anay dugpek
sa kesepatayay da, nekeimatay
walu gatus geetaw danà sigpù di.

⁹Na, sa sumetugdug diyà
kenagdi si Ilyasal anak i
Duday tugod i Ahowa. Kagdi
sa sebaen diyà sa telu mebalaw
etaw i Dabid. Owoy kagdi sa
duma i Dabid mig-atu sa medoo
tegePilistiya nesetipon diyà Pas
Damim anì gumila da. Egoh
iya, migpelaguy sa medoo
sundalu tegeIslaél, ¹⁰dodoo
migpetangtang daa Ilyasal i
owoy inimatayan di sa medoo
tegePilistiya taman nelugpay

sa belad di, huenan di endà dé
nebingbing di duu sa sundang di.
Agulé pinetaban i Datù Nemula
kagda egoh iya agdaw. Hê, sa
medoo liyu sundalu tegeIslaél
migpelaguy, migpelikù da diyà
si Ilyasal anì atulen da sa medoo
matalem sa medoo nematay.

¹¹Na, sa sumetugdug diyà
kenagda si Sama anak i Agi
tegeHalal. Sebaen gai, neetipon
sa medoo tegePilistiya diyà
Léhi, owoy pinengayaw da
sa medoo tegeIslaél diyà sa
galebekan hinemulaan belotung.
Hê migpelaguy sa medoo
sundalu tegeIslaél. ¹²Dodoo
migpetangtang daa Sama i diyà
sa teliwadà sa galebekan anì
segumalangen di. Inimatayan
di sa medoo tegePilistiya owoy
tigtu pinetaban i Datù Nemula
kagda egoh iya agdaw.

¹³Na, egoh sa sasang keketu,
mig-angay diyà si Dabid diyà
ilib Adulam sa telu etaw di.
Nekelapeg siini telu etaw diyà
sa telu pulù mebalaw etaw i
Dabid. Egoh iya, migkampù sa
medoo sundalu tegePilistiya
diyà sa sugud Lépaïm, ¹⁴owoy
netepel da sa menuwa Bétléhém.
Na, ligò i Dabid eg-ugpà dutu
siedò megamel batubatu kenà
di eglidung, ¹⁵linupahan,
huenan di mig-ikagi, guwaen
di, “Hedem, mepion amuk
duen sa kumuwa wayeg
inemen ku dutu siedò tebulan
medapag diyà sa bengawan
sa menuwa Bétléhém.” ¹⁶Hê,
migpekonoskonos mig-awoh
sa telu mebalaw etaw diyà sa
kampù sa medoo tegePilistiya

owoy migtelungtung da wayeg diyà sa paligi medapag diyà sa bengawan sa menuwa Bétléhém owoy inuwit da diyà si Dabid. Dodoo endà ininem i Dabid duu iya wé wayeg, binuwah di polo lagà igbegay uloy diyà si Nemula. ¹⁷Na, mig-ikagi Dabid i, guwaen di, “O Datù Nemula, endà metikà ku duu uminem ini i wayeg, enù ka lagà depanug sa etaw migkuwa ini i danà da migpesunù sa hagtay da.” Huenan di, endà ininem i Dabid sa wayeg.

Na, iya sa binaelan sa telu mebalaw etaw i Dabid.

Ini Denu Sa Telu Pulù Mebalaw Sundalu I Dabid

¹⁸Na, si Abishay sa hadi i Hoab anak i Seluwaya sa ulu-ulu sa telu pulù mebalaw etaw i Dabid. Egeh sa sebaen kesegilaway da, nekeimatay Abishay i telu gatus tegePilistiya danà sa sigpù di. Huenan di, miglalag ma nekeiling sa telu mebalaw etaw i Dabid. ¹⁹Agulé danà di kagdi sa tigtu miglalag diyà sa kedoo da telu pulù, negelal kagdi ulu-ulu da, dodoo endà nekelapeg di diyà sa telu tigtu mebalaw sundalu.

²⁰Duen ma sa sebaen mebalaw sundalu si Bénaya tegeKabsél anak i Héhoyada. Medoo sa miglaklak binaelan di. Inimatayan di sa duwa tigtu mebalaw sundalu tegeMoab. Owoy migpenaug ma dalem sa tosong egoh sa sasang kebunga udan owoy imatayan di sa liyun dalem. ²¹Na, diyà sa sebaen ma

gai, inimatayan di sa mangkag etaw tegeIgiptu. Migkemkem sigpù sa tegeIgiptu, dodoo lubog daa sa kinemkem i Bénaya. Pineka i Bénaya sa sigpù sa tegeIgiptu owoy iya medaa sa ig-imatay di duu. ²²Na, iya sa binaelan i Bénaya anak i Héhoyada. Huenan di, miglalag ma sa ngadan di lagà sa telu mebalaw etaw, ²³dodoo endà doo nekelapeg di diyà kenagda. Danà di kagdi sa uman pa miglalag diyà sa kedoo da telu pulù, ginelal i Dabid ulu-ulu sa tegebantay di.

²⁴Na, ini sa medoo liyu pa дума sa telu pulù mebalaw etaw:

si Asahél hadi i Hoab;

si Élhanaan anak i Dodo sa tegeBétléhém;

²⁵si Sama owoy si Élika tegeHalod;

²⁶si Héléés tegePalté;

si Ila anak i Ikis tegeTékowa;

²⁷si Abiséel tegeAnatot;

si Mébunay tegeHusah;

²⁸si Salmon tegeAhowa;

si Mahalag tegeNétopa;

²⁹si Hélééb anak i Baana

tegeNétopa ma;

si Itay anak i Libay tegeGibiyon diyà tanà

Bénhamin;

³⁰si Bénaya tegePilatun;

si Hiday sa eg-ugpà

medapag diyà ang-ang

Gaas;

³¹si Abi Albon tegeAlaba;

si Asmabét tegeBahulim;

³²si Ilyaba tegeSal-Abon;

owoy sa medoo anak i

Hasen;

- ³³ si Honatan anak i Siyama tegeHalal;
 si Ahiyam anak i Salal tegeHalal ma;
³⁴ si Ilipélét anak i Ahasbay tegeMaaka;
 si Iliyam anak i Ahitopél tegeGilo;
³⁵ si Héslo tegeKalmél;
 si Alay sa tegeAlba;
³⁶ si Igal anak i Natan tegeSoba sa bébê i Hagadi;
³⁷ si Selék tegeAmon;
 si Nahalay tegeBélot sa atung tegeuwit kinemkem i Hoab anak i Seluwaya;
³⁸ si Ila owoy si Galeb anan tegeHatil;
³⁹ owoy si Uliyas tegeHétiyo. Telu pulù owoy pitu da langun.

Ini Sa Egh I Dabid Mig-esà Sa Medoo Sundalu Di

24 ¹Na, migbulit dema Datù Nemula i diyà sa medoo tegeIslaél, huenan di sineguwit di Dabid i anì pigtamayan di kagda. Guwaen di diyà si Dabid, “Esà ko sa medoo etaw diyà tanà Islaél owoy tanà Huda.”

²Huenan di, mig-ikagi Datù Dabid i diyà si Hoab owoy diyà sa medoo liyu ulu-ulu sundalu di, guwaen di, “Ipanawi yu sa langun tugod i Islaél, kumedu diyà tanà Dan taman diyà menuwa Bélsiba, owoy esà yu sa medoo etaw dahiya anì metiigan ku sa kedoo da.”

³Dodoo migsagbi Hoab i diyà sa datù, guwaen di, “Hedem takepen i Datù Nemula sa

Nemula ko sa medoo etaw ko magatus gulé, owoy hedem hauwen ko ini i. Dodoo, o Datù Meadatan, maen di ya ungayà ko baelan ini i?”

⁴Dodoo tigtu igpeges i Dabid ini i, huenan di mig-ipanaw Hoab i owoy sa medoo duma ulu-ulu sundalu anì esaen da sa medoo tegeIslaél.

⁵Huenan di, binatas da sa lawa’t Holdan owoy migkampù da diyà menuwa Aluwél denu gimataan sa ang-ang. Agulé kedu dahiya mig-angay da tanà Gad dò owoy miglagbas da dutu Hasél dò. ⁶Mig-angay da ma diyà tanà Galaad, owoy diyà Tatim Hodsi, owoy diyà tanà Dan Haan, agulé migpelagbas da diyà tanà Sidon. ⁷Hê, mig-angay da ma diyà sa kinutà menuwa Tilo owoy diyà sa langun menuwa sa medoo tegeHibiya owoy sa medoo tegeKanan. Agulé sa pupusan sa keipanaw da, mig-angay da diyà Bélsiba dutu siedd begangbegang denu belabagan sa tanà Huda. ⁸Nesuluh da mig-ipanawan sa tanà Islaél taman siyow gebulan owoy duwa pulù agdaw. Agulé miglikù da dutu Hélusalém dò.

⁹Na, tinulon i Hoab diyà si Datù Dabid sa kedoo maama mekegaga gumila. Walu gatus ngibu diyà tanà Islaél owoy lima gatus ngibu diyà tanà Huda.

¹⁰Hê, nesenulé Dabid i egoh di neubus migpeesà sa medoo etaw. Huenan di, mig-ikagi diyà si Nemula, guwaen di, “Nekesalà a danà sa binaelan ku. Egpehiduhidu a diyà keniko,

o Datù Nemula, peuloyi ko aken i egsugùsuguen ko enù ka kadupangan polo sa binaelan ku.”

¹¹Na, egoh i Dabid endà pa eg-enaw diyà sa sumetugdug agdaw, mig-ikagi Datù Nemula i diyà si Gad sa tegesugkow di atung egtulon diyà si Dabid, ¹²guwaen di, “Ipanaw ka tuloni ko Dabid i. Guwaen ko, ‘Ini sa kagi i Datù Nemula: pehemilien ku kuna tayu di diyà sa telu pigtamay sa baelan ku diyà keniko.’”

¹³Huenan di, mig-angay Gad i diyà si Dabid owoy tinulonon di, guwaen di, “Tayu di diyà sa telu sa ungayà ko: Telu gepalay bitil diyà sa uwang tanà ko, ataw ka telu gebulan sa lugay yu melaguy danà sa medoo kuntelà yu takà eglohot keniyu, ataw ka telu agdaw lihay mekeuma diyà sa tanà ko? Na, temù ko penemdem ini i, owoy petiigi ko diyà kenak sa isagbi ko anì metulon ku diyà si Nemula sa migpeangay kenak.”

¹⁴Agulé migsagbi Dabid i diyà si Gad, guwaen di, “Tigtu a nelikutan eghemilì. Mepion pa amuk si Nemula dé sa migtamay kenami enù ka mehidu Datù Nemula i, beken daa sa medoo etaw.”

¹⁵Huenan di, migpeuwit lihay Nemula i diyà tanà Islaél edung magtu simag taman sa gai inikagi di. Hê, pitu pulù ngibu geetaw sa nematay kumedu diyà tanà Dan taman diyà menuwa Bélsiba. ¹⁶Na, egoh sa egsugùsuguen i Nemula buyu dé pedaet sa menuwa Hélusalém,

nepelumanan sa penemdem i Nemula migtamay sa medoo etaw. Agulé mig-ikagi diyà sa egsugùsuguen di, guwaen di, “Naal dé! Yaka dé egpigtamay kenagda.” Na egoh iya, sa egsugùsuguen i Nemula dutu siedò kenà i Alona tegeHébusiyo eg-elik.

Ini Sa Egoh I Dabid Migbael Sa Atung Kenà Egbegay Uloy

¹⁷Na, egoh i Dabid mighaa sa egsugùsuguen i Nemula eg-imatay sa medoo etaw, mig-ikagi diyà si Datù Nemula, guwaen di, “Aken daa sa nekesalà. Dodoo siini medoo etaw, endà duen sa netiigan da, nekeiling da daa sa hinagtay kebilibili. Endà duen sa salà binaelan da. Aken daa owoy sa malayan ku sa pigtamayi ko.”

¹⁸Na, egoh iya wé agdaw mig-angay Gad i diyà si Dabid owoy mig-ikagi diyà kenagdi, guwaen di, “Tekedeg ka angay dutu siedò kenà i Alona tegeHébusiyo eg-elik owoy bael ka sa kenà egbegay uloy diyà si Nemula dutu.” ¹⁹Huenan di migtekedeg Dabid i danà sa igsugù i Nemula igsugkow i Gad. ²⁰Na, egoh i Alona mighaa si Dabid owoy sa medoo etaw di egdapag, miglaun owoy migligkued diyà sa taengan i Dabid tandà sa keadat di.

²¹Mig-ikagi Alona i, guwaen di, “O Datù Meadatan, maen di ya kaini ka?”

Migsagbi Dabid i, guwaen di, “Mig-angay a dini anì beliyen ku sa kenà ko eg-elik, enù ka mael

a sa kenà egbegay uloy diyà si Nemula anì sumabuh dé sa lihay sa medoo etaw.”

²²Agulé mig-ikagi Alona i, guwaen di, “O Datù Meadatan, kuwa ko sumalà dé sa egkeiyapan ko owoy begayi ko diyà si Nemula. Kaini sa medoo sapi atung ulowen ibegay diyà si Nemula, owoy kaini ma sa medoo kukung da lapeg sa medoo papan atung eggamiten eg-elik anì temegen. ²³O Datù Meadatan, ibegay ku langun ini i diyà keniko, hedem sakemen i Datù Nemula, sa Nemula epgigtuuwen ku, sa ibegay ko uloy.”

²⁴Dodoo migsagbì Dabid i, guwaen di, “Endà sakemen ku

duu iya wé, dodoo bayadan ku polo kuna. Endà megay a diyà si Datù Nemula, sa Nemula epgigtuuwen ku, sa medoo eg-ulowen ibegay uloy asal endà duen sa ulan di.”

Huenan di, binayadan i Dabid lima pulù getibulu pilak sa kenà i Alona eg-elik owoy sa medoo sapi. ²⁵Agulé migbael Dabid i dahiya sa kenà egbegay uloy diyà si Datù Nemula. Owoy dahiya migbegay sa medoo eg-ulowen owoy migbegay ma sa medoo ibegay uloy denu sa mepion kesedumaway. Huenan di, sinagbian i Datù Nemula sa kesimbà i Dabid denu sa tanà Islaél, agulé migsabuh sa dakel lihay.